

金

史

二



卷第三

金史三

醫司桂國錄軍國事聖喜丞相膠國史領經筵事都總局成服奉

新修

太宗

太宗體元應運世德昭功哲惠仁聖文烈皇帝諱晟本諱
吳乞買世祖第四子母曰翼簡皇后挾懶氏太祖母弟也
遼大康元年乙卯歲生初爲穆宗養子收國元年七月命
爲諱班勃極烈太祖征伐常居守天輔五年賜詔曰汝惟
朕之母弟義均一體是用汝貳我國政凡軍事違者閱實
其罪從宜處之其餘事無大小一依本朝舊制天輔七年

六月太祖次鴛鴦濼有疾至幹獨山驛召赴行在詔曰今
遼主盡喪其師奔于夏國遼官特列遙設等刼其子雅里
而立之已留宗翰等措畫朕親巡已久功亦大就所獲州
部政須綏撫是用還都八月中旬可至春州汝率內戚迎
我若至豹子崖尤善八月乙未會于渾河北戊申太祖崩
九月乙卯葬太祖于宮城西國論勃極烈果鄆王昂宗峻
宗幹率宗親百官請正帝位不許固請亦不許宗幹率諸
弟以赭袍被體寘壘懷中丙辰即皇帝位己未告祀天地
丙寅大赦中外改天輔七年爲天會元年癸酉發春州粟
賑降人之徙于上京者戊寅詔諸猛安賦米給戶口在內

地匱乏者南路軍帥閻母敗張覺于樓峯口十月壬辰詔以空名宣頭百道給西南西北兩路都統宗翰曰今寄爾以方面如當遷授必待奏請恐致稽滯其以便宜從事己亥上京慶元寺僧獻佛骨却之閻母及張覺戰于兔耳山閻母敗績十一月壬子命宗望問閻母罪以其兵討張覺壬戌復以空名宣頭及銀牌給上京路軍帥實古廼婆盧火等癸亥宗望以閻母軍發廣寧下瀕海諸郡縣詔諭南京割武朔二州入于宋婁室破朔州西山擒其帥趙公直勃董幹魯別及勃刺速破走乙室白答於歸化己巳徙遷潤來隰四州之民于瀋州庚午宗望及張覺戰于南京東

大敗之張覺奔宋城中人執其父及二子以獻戮之軍中
壬申張忠嗣張敦固以南京降遣使與張敦固入諭城中
復殺其使者以叛己卯詔女直人先有附於遼今復虜獲
者悉從其所欲居而復之其奴婢部曲昔雖逃背今能復
歸者並聽爲民十二月辛巳蠲民間餽息詔以咸州以南
蘇復州以北年穀不登其應輸南京軍糧免之甲午詔曰
比聞民間乏食至有鬻其子者其聽以丁力等者贖之是
日以國論勃極烈果爲諳班勃極烈宗幹爲國論勃極烈
遣勃堇李靖如宋告哀

二年春正月庚戌朔以謾都訶爲阿捨勃極烈參議國政

壬子命賞宗望及將士克南京之功赦閹母罪甲寅以空
名宣頭五十銀牌十給宗望戊午詔李董完顏阿實賚曰
先帝以同姓之人有自鬻及典質其身者命官爲贖今聞
尚有未復者其悉閱贖之癸亥以東京比歲不登詔減田
租市租之半甲戌西南西北兩路都統宗翰宗望請勿割
山西郡縣與宋上曰是違先帝之命也其速與之夏國奉
表稱藩以下寨以北陰山以南乙室耶剌部吐祿濬西之
地與之丙子貽宋書索俘虜叛亡丁丑始自京師至南京
每五十里置驛二月詔有盜發遼諸陵者罪死庚寅詔命
給宗翰馬七百疋田種千石米七千石以賑新附之民丁

酉命徙移懶路都勃堇完顏忠于蘇瀕水乙巳詔諭南京
官僚小大之事必關白軍帥無得專達朝廷丙午宗翰乞
濟師詔有司選精兵五千給之丁未命宗望凡南京留守
及諸闕貲可選勲賢有人望者就注擬之具姓名官階以
聞三月己酉朔命宗望以宋歲幣銀絹分賜將士之有功
者庚戌叛人活孛帶降詔釋之宗望請選良吏招撫遷潤
來隰之民保山砦者從之己未宗望以南京反覆凡攻取
之計乞與知樞密院事劉彥宗裁決之劉公胄王永福棄
家踰城來降以公胄爲廣寧尹永福爲奉先軍節度使辛
未夏國王李乾順遣使上誓表閏月戊寅朔賜夏國誓詔

辛巳命置驛上京春泰之間己丑烏虎里迪烈底兩部來
降丙午旣許割山西諸鎮與宋以宗翰言罷之是月斜野
襲遙輦昭古牙走之獲其妻孥群從及豪族勃堇渾斡等
破奚七巖而撫其民人四月己酉以宗翰經略西夏及破
遼功賜以十馬使自擇其二餘以分諸帥賑上京路西北
路降者及新徙嶺東之人戊午以實古廼所築上京新城
名會平州乙亥詔贖上京路新遷寧江州戶口賣身者六
百餘人宋遣使來弔喪以高木僕古等充遺留國信使高
興輔劉興嗣等充告即位國信使如宋五月丁丑朔上京
軍帥實古廼以所獲印綬二十二及銀牌來上癸未詔曰

新降之民訴訟者衆今方農時或失田業可俟農隙聽決
丁亥婆速路猛安僕盧古以賊罷以謀克習泥烈代之乙
巳曷懶路軍帥完顏忽剌古等言往者歲捕海狗海東青
鴉鶻於高麗之境近以二舟往彼乃以戰艦十四要而擊
之盡殺二舟之人奪其兵仗上曰以小故起戰爭甚非所
宜今後非奉命毋輒往闔母克南京殺都統張敦固七月
壬午皇子宗峻薨丙戌禁外方便介冗從多者壬辰鶻實
答言高麗納吾叛亡增其邊備必有異圖詔曰納我叛亡
而弗歸其曲在彼凡有通問毋違常式或來侵略整爾行
列與之從事敢先犯彼雖捷必罰乙未以烏虎部及諸營

叛以昞勃極烈昱等討平之八月乙巳朔以孛堇烏不乃等爲賀宋生辰使丁巳撒离改部猛安雛思以賊罷以奚金家奴代之六部都統撻懶擊走昭古牙殺其隊將曷魯燥白撒曷等又破降駱駝山金源興中諸軍詔增給銀牌十十月甲辰朔夏國遣使謝誓詔戊午天清節宋夏遣使來賀甲子詔發寧江州粟賑泰州民被秋潦者遙輦昭古牙率衆來降興中府降丙寅詔有司運米五萬石于廣寧以給南京潤州戊卒命南路軍帥閣母以甲士千人益合蘇館路孛堇完顏阿實賚以備高麗戊辰西南西北兩路權都統幹魯言遼詳穩撻不野來奔言耶律大石自稱爲

王置南北官屬有戰馬萬疋遼主從者不過四千戶有步騎萬餘欲趨天德駐余都谷詔曰追襲遼主必酌事宜其討大石則俟報下十一月癸未閣母下宜州拔叔牙山殺節度使韓慶民癸卯詔以米五萬石給撻懶實古廼十二月戊申以孛堇高居慶等爲賀宋正旦使

三年正月癸酉朔宋夏遣使來賀戊子同知宣徽院事韓資正加尚書左僕射爲諸宮都部署乙未夏國遣使奠幣及賀即位宋遣使賀即位二月壬戌婁室獲遼主于余睹谷丁卯以厖葛城地分授所徙烏虎里迪烈二部及契丹民三月乙亥阿捨勃極烈謾都訶薨丙子賑奚契丹新附

之民辛巳建乾元殿幹魯獻傳國寶以謀葛失來附請授
印綬是日賜完顏婁室鐵券四月壬寅朔詔以遼主赴京
師丁巳南路軍帥察剌以罪罷五月己丑蕭八斤獲遼王
寶來獻六月庚申以獲遼主遣李用和等充告慶使如宋
七月壬申禁内外官宗室毋私役百姓己卯南京帥以錦
州野蠶成繭奉其絲綿來獻命賞其長吏詔權勢之家毋
買貧民爲奴其脅買者一人償十五人詐買者一人償二
人皆杖一百甲申詔南京括官豪牧馬以等第取之分給
諸軍以耶律固等爲宋報謝使八月癸卯幹魯以遼主至
京師甲辰告于太祖廟丙午遼主延禧入見降封海濱王

壬子詔有司揀閱善射勇健之士以備宋九月壬午廣寧府獻嘉禾癸巳保州路都李董加古撒曷有罪伏誅以李董徒單烏烈代之十月甲辰詔諸將伐宋以諳班勃極烈果兼領都元帥移賚勃極烈宗翰兼左副元帥先鋒經略使完顏希尹爲元帥右監軍左金吾上將軍耶律余睹爲元帥右都監自西京入太原六部路軍帥撻懶爲六部路都統斜也副之宗望爲南京路都統闊母副之知樞密院事劉彥宗兼領漢軍都統自南京入燕山詔建太祖廟于西京召耶魯赴京師教授女直字戊申有司言權南路軍帥鵬實荅官吏貪縱詔鞠之壬子天清節宋夏遣使來賀

丁巳以閹母爲南京路都統埽喝副之宗望爲閹母劉彥
宗兩軍監戰壬戌詔曰今大有年無儲蓄則何以備饑饉
其令牛一具賦粟一石每謀克爲一廩貯之宋易州戍將
韓民毅以軍降處之蔚州十一月庚辰以降封遼主爲海
濱王詔中外辛卯南路軍帥司請禁契丹奚漢人挾兵器
詔勿禁以張忠嗣權簽南京中書樞密院事十二月庚子
宗翰下朔州甲辰宗望諸軍及宋郭藥師張企徽劉舜仁
戰於白河大破之蒲覓敗宋兵于古北口丙午郭藥師降
燕山州縣悉平戊申宗翰克代州乙卯中山降丙辰宗望
破宋兵五千于真定戊午宗翰圍太原耶律余睹破宋河

東陝西援兵于汾河北甲子宗望克信德府

四年春正月丁卯朔始朝日降臣郭藥師董才皆賜姓完
顏氏戊辰宗弼取湯陰大臭攻下濬州迪古補取黎陽已
巳諸軍渡河庚午取滑州宗望使吳孝民等入汴問宋取
首謀平山童貫譚稹詹度及張覺等宋太上皇帝出奔癸
酉諸軍圍汴甲戌宋使李枕來謝罪且請修好宗望許宋
修好約質割三鎮地增歲幣載書稱伯姪戊寅宋以康王
構少宰張邦昌爲質辛巳宋上誓書地圖稱姪大宋皇帝
伯大金皇帝癸未諸軍解圍二月丁酉朔夜宋將姚平仲
兵四十萬來襲宗望營敗之己亥復進師圍汴宋使宇文

虛中以書來改以肅王樞爲質遣康王構歸師還壬子以滑瀋二州與宋宗翰定威勝軍攻下隆德府丁巳次澤州海濱王家奴誣其主欲亡去詔誅其首惡餘並杖之三月癸未銀术可圍太原宗翰還西京四月癸卯宗望使宗弼來奏捷乙丑耿守忠等大敗宋兵于西都谷五月辛未宋种師中以兵出井陘癸酉完顏活女敗之于殺熊嶺斬師中於陣是日拔离速敗宋姚古軍於隆州谷六月丙申朔高麗國王王楷奉表稱藩庚戌宗望獻所獲三象庚申以宗望爲右副元帥七月丙寅遣高伯淑等宣諭高麗壬申出金牌命李董大臬以所領渤海軍八猛安爲萬戶戊子

以鐵勒部長奪离刺不從其兄夔里本叛賜馬十一豕百錢五百萬蕭仲恭使宋還以所持宋帝與耶律余睹蠟書自陳八月庚子詔左副元帥宗翰右副元帥宗望伐宋宋張灝率兵出汾州拔离速擊走之劉臻以兵出壽陽婁室破之庚戌宗翰發西京辛亥婁室等破宋張灝軍于文水癸丑宗望發保州是日耶律鐸破宋兵于雄州那野等敗宋兵于中山甲寅新城縣進白烏庚申突撚取新樂九月丙寅宗翰克太原執經略使張孝純鵬沙虎取平遥靈石孝義介休諸縣己巳復以南京爲平州辛未宗望破宋种師閔軍於井陘取天威軍克真定殺其守李邈十月婁室

克汾州石州降蒲察克平定軍遼州降丁未天清節高麗
夏遣使來賀中京進嘉禾十一月甲子宗翰自太原趨汴
丙寅宗望自真定趨汴戊辰宗翰下威勝軍癸酉撒剌荅
破天井關乙亥宗翰克隆德府活女渡盟津西京永安軍
鄭州皆降庚辰宗翰克澤州宗望諸軍渡河臨河大名二
縣德清軍開德府皆下丙戌克懷州是日宗望至汴閏月
壬辰朔宋出兵拒戰宗望等擊敗之癸巳宗翰至汴丙辰
克汴城庚申以高隨充高麗生日使辛酉宋主桓出居青
城十二月癸亥宋主桓降是日歸于汴城庚辰詔曰朕惟
國家四境雖遠而兵革未息田野雖廣而畎畝未闢百工

略備而祿秩未均方貢僅修而賓館未贍是皆出乎民力苟不務本業而抑游手欲上下皆足其可得乎其令所在長吏敦勸農功

五年正月辛卯朔高麗夏遣使來賀癸巳宗翰宗望使使以宋降表來上乙未知樞密院事劉彥宗上表請復立趙氏不聽丁巳回鶻喝里可汗遣使入貢二月丙寅詔降宋二帝爲庶人三月丁酉立宋少宰張邦昌爲大楚皇帝割地賜夏國四月乙酉克陝府取虢州丙戌以六部路都統撻懶爲元帥左監軍南京路都統閣母爲元帥左都監宗翰宗望以宋二帝歸己丑詔曰合蘇館諸部與新附人民

其在降附之後同姓爲婚者離之五月庚寅朔宋康王構
即位於歸德宋殺張邦昌婁室降解絳慈隰石河中岢嵐
寧化保德火山諸城槌懶徇地山東下密州迪虎下單州
廣信軍降六月庚申詔曰自河之北今旣分畫重念其民
或見城邑有被殘者不無疑懼遂命堅守若即討伐生靈
可愍其申諭以理招輯安全之儻執不移自當致討若諸
軍敢利於俘掠輒肆蕩毀者底于罰庚辰右副元帥宗望
薨漢國王宗傑繼薨七月甲午賜宗翰券書除反逆外咸
貫勿論以石州成將烏虎棄城喪師杖之削其官八月戊
寅以宋捷遣耶律居謹等充宣慶使使高麗丙戌以宗輔

爲右副元帥詔曰河北河東郡縣職貢多闕宜開貢舉取士以安新民其南北進士各以所業試之九月丁未詔曰內地諸路每耕牛一具賦粟五斗以備歉歲辛亥賜元帥右監軍完顏希尹萬戶銀朮可券書除赦所不原餘並勿論闕毋取河間大敗宋兵于莫州雄州降撻懶克祁州永寧軍保州順安軍皆降冬十月丁卯沙州回鶻活刺散可汗遣使入貢辛未天清節高麗夏遣使來賀宋二帝自燕徙居于中京十二月丙寅右副元帥宗輔伐宋徇地淄青烏林荅泰欲敗宋將李成于淄州趙州降阿里刮徇地濬州敗敵兵遂取滑州乙亥西南路都統幹魯薨己卯賽里

下汝州

六年正月丙戌朔高麗夏遣使來賀宗弼破宋鄭宗孟軍于青州銀术可取鄧州薩謀魯入襄陽拔离速入均州馬五取房州癸巳克青州癸卯闢母克濰州丁未迪古補敗宋將趙子昉兵撒离喝敗宋兵于河上甲寅宋將馬括兵次樂安宗輔擊敗之聞宋主在維揚以農時還師宗弼敗宋兵于河上二月乙卯朔拔离速取唐州癸亥取蔡州巳巳移刺古敗宋將臺宗雋等兵于大名庚午再破其軍獲臺宗雋及宋忠甲戌拔离速取陳州癸未克潁昌府鄭州叛入于宋復取鄭州遷洛陽襄陽潁昌汝鄭均房唐鄧陳

蔡之民于河北宗翰復遣婁室攻下同華京兆鳳翔擒宋經制使傅亮阿隣破河中幹魯入馮翊三月壬辰命南路軍帥實古迺籍節度使完顏慎思所領諸部及未置猛安謀克戶來上巳酉撻懶下恩州五月戊戌移沙土古思以本部來附六月己未詔求祖宗遺事撻懶遣兵徇下磁州信德府真定賊自稱元帥秦王撒剌喝討平之七月乙巳宋主遣使奉表請和詔進兵伐之以宋二庶人赴上京八月乙卯婁室敗宋兵于華州訛特剌破敵于渭水遂取下邽丁丑以宋二庶人素服見太祖廟遂入見于乾元殿封其父昏德公子重昏侯是日告于太祖廟以州郡職貢名

稱及俸給因革詔中外九月辛丑繩果等敗宋兵于蒲城
甲申又破敵於同州乙丑取丹州十月丙寅天清節高麗
夏遣使來賀癸酉知樞密院事劉彥宗薨丁丑蒲察婁室
敗宋兵于臨真戊寅徙昏德公重昏侯于韓州庚辰宗翰
宗輔會于濮伐宋十一月庚寅蒲察婁室取延安府壬辰
賑移懶路乙未取濮州綏德軍降婁室再攻晉寧軍其守
徐徽言固守不能克十二月丙辰宗弼取開德府丁卯宗
輔克大名府鵠沙虎敗宋兵于鞏

七年正月庚辰朔高麗夏遣使來賀辛巳吳國王闍毋薨
甲午以南京留守韓企先同中書門下平章事知樞密院

事二月戊辰宋麟府路安撫使折可求以麟府豐三州降
已巳婁室塞里鶻沙虎等破晉寧軍其守徐徽言據子城
拒戰庚午率衆潰圍走擒之使之拜不拜臨之以兵不動
命降將折可求諭之降指可求大罵出不遜語遂殺之其
統制孫昂及士卒皆不屈盡殺之甲戌詔禁醫巫問山遼
代山陵樵採三月己卯朔日中有黑子壬寅詔軍興以來
良人被略爲驅者聽其父母夫妻子贖之尚書左僕射高
貞罷四月蒲察婁室取鄜坊二州五月乙卯拔离速等襲
宋主于楊州九月丙午朔日有食之庚午宗弼敗宋兵于
睢陽辛未降其城是月曹州降十月丙子朔京兆府降丁

丑鞏州降庚寅天清節高麗夏遣使來賀丁酉阿里當海
大臭破敵于壽春己亥安撫使馬世元以城降甲辰廬州
降十一月庚戌徙曷蘇館都統司治寧州乙卯高麗遣使
來貢丙辰宗弼取和州壬戌宗弼渡江敗宋副元帥杜充
軍于江寧丁卯守臣陳邦光以城降十二月丙戌宗弼取
湖州丁亥克杭州阿里蒲盧渾追宋主于明州越州降大
臭敗宋樞密使周望于秀州又敗宋兵于杭州東北戊戌
阿里蒲盧渾敗宋兵于東關遂濟曹娥江壬寅敗宋兵于
高橋宋主入于海

八年正月甲辰朔高麗夏遣使來賀丁巳以同中書門下

平章事韓企先爲尚書左僕射兼侍中己未阿里蒲盧渾克明州執其守臣趙伯諤庚申詔曰避役之民以微直鬻身權貴之家者悉出還本貫阿魯補斜里也下太平順昌及濠州是月宋副元帥杜充以其衆降二月乙亥宗弼還自杭州庚寅取秀州戊戌取平江汴京亂三月丁卯大迪里復取之宗弼及宋韓世忠戰于鎮江不利四月丙申復戰于江寧敗之諸軍渡江是日阿魯補戰于拓臯己亥周企戰于壽春辛丑婁室戰于淳化皆勝之醴州降遂克邠州五月癸卯禁私度僧尼及繼父繼母之男女無相嫁娶戊申詔曰河北河東簽軍其家屬流寓河南被俘掠爲奴

婢者官爲贖之婢復其業六月壬申詔遣遼統軍使耶律曷禮質節度使蕭別離刺等十人分治新附州鎮癸酉詔以昏德公六女爲宗婦七月辛亥詔給泰州都統婆盧火所部諸謀克甲冑各五十先遣婁室經略陝西所下城邑叛服不常其監戰阿盧補請益兵帥府會諸將議曰兵威非不足綏懷之道有所未盡誠得位望隆重恩威兼濟者以往可指日而定若以皇子右副元帥宗輔往爲宜以聞詔曰婁室往者所向輒克今使專征陝西淹延未定豈倦于兵而自愛耶關陝重地卿等其戮力焉丁卯上如東京溫湯徙昏德公重昏侯于鶻里改路九月戊申立劉豫爲

大齊皇帝世修子禮都大名府辛酉諳班勃極烈都元帥
杲薨癸亥宗輔等敗宋張浚軍于富平耀州降乙丑鳳翔
府降十月乙亥上至自東京齊帝劉豫遣使謝封冊甲申
天清節齊高麗夏遣使來賀以鐵驪突离刺同中書門下
平章事詔遼宋官上本國誥命等第換授十一月甲辰宗
輔下涇州丁未渭州降敗宋劉侃軍于瓦亭戊申原州降
宋涇原路統制張中孚知鎮戎軍李彥琦以衆降馬五等
擊宋吳玠軍于隴州庚戌以遙鎮節度使烏克壽等爲齊
劉豫生日使癸亥宗輔以陝西事狀聞詔獎諭之十二月
丁丑完顏婁室薨乙酉宗輔敗宋劉維輔軍壬辰熙州降

九年正月己亥朔齊高麗夏遣使來賀戊申命以徒門水
以西渾曠星顯倭蠡三水以北閑田給曷懶路諸謀克辛
亥蒲察鶻拔魯完顏忒里討張萬敵于白馬湖陷于敵癸
丑以同中書門下平章事時立愛爲侍中知樞密院張忠
嗣爲宣政殿大學士知三司使事宗弼阿盧補撫定鞏洮
河樂西寧蘭廓積石等州涇原熙河兩路皆平四月己卯
詔新徙戍邊戶匱于衣食有典質其親屬奴婢者官爲贖
之戶計其口而有二者以官奴婢益之使戶爲四口又
乏耕牛者給以官牛別委官勸督田作戍戶及邊軍資糧
不繼糴粟于民而與賑卹其續遷戍戶在中路者姑止之

即其地種藝俟畢穫而行及來春農時以至戊所五月丙午分遣使者諸路勸農六月壬辰賜昏德公重昏侯時服各兩襲八月辛巳回鶻隈欲遣使來貢九月己酉和州回鶻執耶律大石之黨撒八迪里突迭來獻十月戊寅天清節齊高麗夏遣使來賀撒离喝攻下慶陽慕洧以環州降宗弼與宋吳玠戰于和尚原敗績十一月己未遷趙氏踈屬于上京以陝西地賜齊

十年正月癸巳朔齊高麗夏遣使來賀己酉齊表謝賜地壬子詔曰昔遼人分士庶之族賦役皆有等差其悉均之二月庚午賑上京路戍邊猛安民四月丁卯詔諸良人知

情嫁奴者聽如故爲妻其不知而嫁者去住悉從所欲移
賚勃極烈左副元帥宗翰朝京師庚午以太祖孫亶爲諳
班勃極烈皇子宗磐爲國論忽魯勃極烈國論勃極烈宗
幹爲國論左勃極烈移賚勃極烈左副元帥宗翰爲國論
右勃極烈兼都元帥右副元帥宗輔爲左副元帥庚寅聞
鴨渚混同江暴漲命賑徙戍邊戶在混同江者閏月辛卯
詔分遣鶻沙虎等十三人閱諸路丁壯調赴軍七月甲午
賑泰州路戍邊戶上如中京九月元帥右都監耶律余睹
謀反出奔其黨燕京統軍使蕭高六伏誅蔚州節度使蕭
特謀葛自殺十月壬寅天清節大赦齊高麗夏遣使來賀

上如興中府齊使使來告母喪十一月癸亥以武良謨爲齊弔祭使癸未撒离喝請取劒外十三州從之部族節度使土古廝捕斬余睹及其諸子函其首來獻十二月庚子撒离喝克金州上至自興中府

十一年正月丁巳朔齊高麗夏遣使來賀丁卯撒离喝敗吳玠于饒峰關戊辰取洋州甲戌入興元府二月己亥元帥府言承詔賑軍士臣恐有司錢幣將不繼請自元帥以下有祿者出錢助給之詔曰官有府庫而取於臣下此何理耶其悉從官給八月甲申黃龍府置錢帛司戊子趙樗誣告其父昏德公謀反樗及其壻劉文彥伏誅戊戌詔曰


比以軍旅未定嘗命帥府自擇人授官今並從朝廷選注
十月丙申天清節齊高麗夏遣使來賀十一月丙寅賑移
懶路宗弼克和尚原十二月癸未賑曷懶路

十二年正月辛亥朔齊高麗夏遣使來賀甲子初改定制
度詔中外丙寅如東京二月丁酉撒离喝敗宋吳玠軍于
固鎮四月至自東京六月甲午以阿盧補爲元帥右都監
十月庚寅天清節齊高麗夏遣使來賀

十三年正月丙午朔日有食之己巳上崩于明德宮年六
十一庚午諡班勃極烈即皇帝位于柩前三月庚辰上尊
謚曰文烈皇帝廟號太宗乙酉葬和陵皇統四年改號恭

陵五年增上尊謚曰體元應運世德昭功哲惠仁聖文烈
皇帝貞元三年十一月戊申改葬于大房山仍號恭陵

贊曰天輔草創未遑禮樂之事太宗以斜也宗幹知國政
以宗翰宗望總戎事既滅遼舉宋即議禮制度治曆明時
續以武功述以文事經國規摹至是始定在位十三年宮
室苑籞無所增益末聽大臣計傳位熙宗使太祖世嗣不
失正緒可謂行其所甚難矣



本紀第四

金史四

開府儀同三司、柱國、總管國事、前中書省、兼監修國史、經筵事、都總裁、臣脫脫奉

勅修

熙宗

熙宗弘基、續武莊靖孝成皇帝諱亶、本諱合剌、太祖孫景宣皇帝子、母蒲察氏、天輔三年己亥歲生、天會八年、詣班勃極烈杲、薨太宗意久未決、十年左副元帥宗翰右副元帥宗輔左監軍完顏希尹入朝、與宗幹議曰、詣班勃極烈虛位已久、今不早定、恐授非其人、合剌先帝嫡孫、當立、相與請於太宗者、再三、廼從之、四月庚午、詔曰、爾為太祖之

嫡孫故命爾為諸班勃極烈其無自謂冲幼狎于童戲惟敬厥德諸班勃極烈者太宗嘗居是官及登大位以命弟杲杲薨帝定議為儲嗣故以是命焉十三年正月己巳太宗崩庚午即皇帝位甲戌詔中外詔公私禁酒癸酉遣使告哀于齊高麗夏及報即位仍詔齊自今稱臣勿稱子二月乙巳追謚太祖后唐括氏曰聖穆皇后裴滿氏曰光懿皇后追冊太祖妃僕散氏曰德妃烏古論氏曰賢妃辛酉改葬太祖于和陵三月己卯齊高麗使來弔祭庚辰謚大行皇帝曰文烈廟號太宗乙酉葬太宗于和陵甲午以國論右勃極烈都元帥宗翰為太保領三省事封晉國王戊

戊詔諸國使賜宴不舉樂四月戊午齊高麗遣使賀即位
丙寅昏德公趙佖薨遣使致祭及賻贈是月甘露降于熊
岳縣五月甲申左副元帥宗輔薨九月壬申追尊皇考豐
王爲景宣皇帝廟號徽宗皇妣蒲察氏爲惠昭皇后戊寅
尊太祖后紇石烈氏太宗后唐括氏皆爲太皇太后詔中
外乙酉改葬徽宗及惠昭后于興陵十一月以尚書令宋
國王宗磐爲太師乙亥初頒曆己卯以元帥左監軍完顏
希尹爲尚書左丞相兼侍中太子少保高慶裔爲左丞平
陽尹蕭慶爲右丞己丑建天開殿于文刺十二月癸亥始
定齊高麗夏朝賀賜宴朝辭儀以京西鹿園賜農民十四

年正月己巳朔上朝太皇太后于兩宮齊高麗夏遣使來賀癸酉頒曆于高麗丁丑太皇太后統石烈氏崩乙酉萬壽節齊高麗夏遣使來賀上本七月七日生以同皇考忌日改用正月十七日二月癸卯上尊諡曰欽獻皇后葬睿陵三月壬午以太保宗翰太師宗磐太傅宗幹並領三省事丁酉高麗遣使來弔八月丙辰追尊九代祖以下曰皇帝皇后定始祖景祖世祖太祖太宗廟皆不祧癸亥詔齊國與本朝軍民訴訟相關者文移署年止用天會十月甲寅以吳激爲高麗王生日使蕭仲恭爲齊劉豫回謝并生日正旦使十五年正月癸亥朔上朝太皇太后于明德宮

齊高麗夏遣使來賀初用大明曆己卯萬壽節齊高麗夏遣使來賀六月庚戌尚書左丞高慶裔轉運使劉思有罪伏誅七月辛巳太保領三省事晉國王宗翰薨丙戌夜京師地震封皇叔宗雋宗固叔祖暈皆爲王丁亥汰兵興監爵十月乙卯以元帥左監軍撻懶爲左副元帥封魯國王宗弼右副元帥封瀋王知樞密院事兼侍中時立愛致仕十一月丙午廢齊國降封劉豫爲蜀王詔中外置行臺尚書省于汴十二月戊辰劉豫上表謝封爵癸未詔改明年爲天眷元年大赦命韓昉耶律紹文等編修國史以昂爲尚書左丞同中書門下平章事徙蜀王劉豫臨潢府

天眷元年正月戊子朔上朝明德宮高麗夏遣使來賀頒
女直小字封大司空昱爲王甲辰萬壽節高麗夏遣使來
賀二月壬戌上如爻刺春水乙丑幸天開殿己巳詔罷來
流水混同江護邏地與民耕牧三月庚寅以禁苑隙地分
給百姓戊申以韓昉爲翰林學士四月丁卯命少府監盧
彥倫營建宮室止從儉素壬午朝享于天元殿立裴端氏
爲貴妃五月己亥詔以經義詞賦兩科取士六月戊午上
至自天開殿秋七月辛卯左副元帥撻懶東京留守宗雋
來朝丁酉按出許河溢壞廬舍民多溺死壬寅左丞相希
尹罷八月甲寅朔頒行官制癸亥回鶻遣使朝貢己卯以

河南地與宋以右司侍郎張通古等使江南以京師爲上
京府曰會寧舊上京爲北京九月甲申朔以契爲會寧牧
封鄧王乙未詔百官誥命女直契丹漢人各用本字渤海
同漢人丁酉改燕京樞密院爲行臺尚書省戊戌上朝明
德宮甲辰以契爲平章政事己酉省燕中西三京平州東
西等路州縣辛亥權行臺左丞相張孝純致仕十月甲寅
朔以御前管勾契丹文字李德固爲叅知政事丙寅封叔
宗強爲紀王宗敏邢王太宗子斛魯補等十三人爲王己
巳始禁親王以下佩刀入宮辛未定封國制癸酉以東京
留守宗雋爲尚書左丞相兼侍中封陳王十一月丙辰以

康宗以上畫像工畢莫獻于乾元殿十二月癸亥新宮成
甲戌高麗遣使入貢丁丑立貴妃裴滿氏爲皇后

二年正月壬午朔高麗夏遣使來賀戊戌萬壽節高麗夏
遣使來賀以左丞相宗雋爲太保領三省事進封究國王
興中尹完顏希尹復爲尚書左丞相兼侍中二月乙未上
如天開殿三月丙辰命百官詳定儀制四月甲戌百官朝
參初用朝服己卯宋遣使謝河南地五月戊子太白晝見
乙巳上至自天開殿六月己酉朔初御冠服辛亥吳十謀
反伏誅己未上從容謂侍臣曰朕每閱貞觀政要見其君
臣議論大可規法翰林學士韓昉對曰皆由太宗溫顏訪

問房杜輩竭忠盡誠其書雖簡足以爲法上曰太宗固一代賢君明皇何如昉曰唐自太宗以來惟明皇憲宗可數明皇所謂有始而無終者初以艱危得位用姚崇宋璟惟正是行故能成開元之治末年怠于萬機委政李林甫姦諛是以致天寶之亂苟能慎終如始則貞觀之風不難追矣上稱善又曰周成王何如主昉對曰古之賢君上曰成王雖賢亦周公輔佐之力後世疑周公殺其兄以朕觀之爲社稷大計亦不當非也七月辛巳宋國王宗磐充國王宗雋謀反伏誅丙戌以右副元帥宗弼爲都元帥進封越國王丁亥以誅宗磐等詔中外巳丑以左副元帥撻懶

爲行臺左丞相杜充爲行臺右丞相蕭寶耶律暉行臺平
章政事甲午咸州詳穩沂王暈坐與宗磐謀反伏誅辛丑
以太傅領三省事宗幹爲太師領三省如故進封梁宋國
王八月辛亥行臺左丞相撻懶翼王鶻懶及活剌胡土撻
懶子幹帶烏達補謀反伏誅丁丑太白晝見九月戊寅朔
降封太宗諸子大司空昱罷丙申初居新宮立太祖原廟
于慶元宮壬寅宋遣王倫等乞歸父喪及母韋氏等拘倫
不遣以溫都思忠諸路廉問十月癸酉夏國使來告喪十
二月豫國公昱薨

三年正月丁丑朔高麗夏遣使來賀癸巳萬壽節高麗夏

遣使來賀以都元帥宗弼領行臺尚書省事四月乙巳朔
溫都思忠廉問諸路得廉吏杜遵晦以下百二十四人各
進一階貪吏張軫以下二十一人皆罷之癸丑蜀國公完
顏銀术哥薨丁卯上如燕京五月丙子詔元帥府復取河
南陝西地巳卯詔冊李仁孝爲夏國王命都元帥宗弼以
兵自黎陽趨汴右監軍撒离合出河中趨陝西是月河南
平六月陝西平上次涼涇大旱使蕭彥讓田穀決西京囚
秋七月癸卯朔日有食之乙卯宗弼遣使奏河南陝西捷
丁卯詔文武官五品以上致仕給俸祿之半職三品者仍
給僉人八月辛巳招撫諭陝西五路壬午初定公主郡縣

主及駙馬官品九月壬寅朔宗弼來朝戊申上至燕京已酉親饗太祖廟庚申宗弼還軍中夏國遣使謝賻贈癸亥殺左丞相完顏希尹右丞相蕭慶及希尹子昭武大將軍把搭符寶郎漫帶戊辰夏國遣使謝封冊十一月癸丑以孔子四十九代孫璫襲封衍聖公癸亥以都點檢蕭仲恭爲尚書右丞前西京留守昂爲平章政事甲子行臺尚書右丞相杜充薨十二月乙亥都元帥宗弼上言宋將岳飛張俊韓世忠率衆渡江詔命擊之丁丑地震己亥以元帥左監軍阿离補爲左副元帥右監軍撒离合爲右副元帥皇統元年正月辛丑朔高麗夏遣使來賀庚戌群臣上尊

號曰崇天體道欽明文武聖德皇帝初御袞冕癸丑謝太廟大赦改元丁巳萬壽節高麗夏遣使來賀己未初定命婦封號夏國請置榷場許之己巳封平章政事昂爲漆水郡王二月戊寅詔諸致仕官職俱至三品者俸祿人力各給其半宗弼克廬州乙酉改封海濱王耶律延禧爲豫王昏德公趙佶爲天水郡王重昏侯趙桓爲天水郡公戊午上親祭孔子廟北面再拜退謂侍臣曰朕幼年游佚不知志學歲月逾邁深以爲悔孔子雖無位其道可尊使萬世景仰大凡爲善不可不勉自是頗讀尚書論語及五代遼史諸書或以夜繼焉己未上宴羣臣于瑤池殿適宗弼遣

使奏捷侍臣多進詩稱賀帝覽之曰太平之世當尚文物自古致治皆由是也四月丙子以濟南尹韓昉參知政事辛巳宗弼請伐江南從之五月己酉太師領三省事梁宗國王宗幹薨庚戌上親臨日官奏戌亥不宜哭泣上曰君臣之義骨肉之親豈可避之遂哭之慟命輟朝七日六月甲戌詔都元帥宗弼與宰執同入奏事庚寅行臺平章政事耶律暉致仕壬辰有司請舉樂上以宗幹新喪不允甲午紀王宗強薨上親臨輟朝如宗幹喪七月癸卯以景宣皇帝忌辰命尚食徹肉丙午以宗弼爲尚書左丞相兼侍中都元帥領行臺如故己酉宗弼還軍中辛亥參知政事

耶律讓罷九月戊申上至自燕京朝太皇太后于明德宮
詔賜鰥寡孤獨不能自存者人絹二疋絮三斤是秋蝗都
元帥宗弼伐宋渡淮以書讓宋宋復書乞罷兵宗弼以便
宜畫淮爲界十一月己酉高麗國賀受尊號稽古殿火十
二月癸巳夏國賀受尊號天水郡公趙桓乞本品俸詔賜
濟之左丞勛進先朝實錄三卷上焚香立受之

二年正月乙未朔高麗夏遣使來賀己亥上獵于來流河
乙巳命伐高麗丁未上至自來流河辛亥萬壽節高麗夏
遣使來賀壬子衍聖公孔璠薨子極襲二月丁卯上如天
開殿甲戌賑熙河路戊子皇子濟安生辛卯宋使曹勛來

許歲幣銀絹二十五萬兩匹畫淮爲界世世子孫永守誓
言改封蜀王劉豫爲曹王壬辰以皇子生赦中外三月辛
丑還自天開殿大雪丙午以宗弼爲太傅丙辰遣左宣徽
使劉筈以袞冕圭冊冊宋康王爲帝歸宋帝母韋氏及故
妻邢氏天水郡王并妻鄭氏喪于江南戊午立子濟安爲
皇太子丙寅以臣宋告中外庚午五雲樓重明等殿成五
月癸巳朔不視朝上自去年荒于酒與近臣飲或繼以夜
宰相入諫輒飲以酒曰知卿等意今旣飲矣明日當戒因
復飲乙卯賜宋誓詔辛酉宴群臣於五雲樓皆盡醉而罷
七月甲午回鶻遣使來貢北京廣寧府蝗丁酉賜宗弼金

券八月丁卯詔歸朱弁張邵洪皓于宋辛未復太宗子胡
盧爲王賑陝西九月壬辰詔給天水郡王子姪壻天水郡
公子俸給十一月甲寅平章政事漆水郡王昂薨追封鄆
王十二月乙丑高麗王遣使謝封冊庚午宋遣使謝歸三
喪及母韋氏壬申上獵于核耶呆米路癸未還宮甲申皇
太子濟安薨

三年正月己丑朔以皇太子喪不御正殿群臣詣便殿稱
賀宋高麗夏使詣皇極殿遙賀乙巳萬壽節如正旦儀三
月辛卯以尚書左丞勗爲平章政事殿前都點檢宗憲爲
尚書左丞丁酉太皇太后唐括氏崩己酉封子道濟爲魏

王五月丁巳朔京兆進瑞麥癸亥上致祭太皇太后甲申
初立太廟社稷六月己酉初置驍毅軍七月丙寅上致祭
太皇太后庚辰太原路進獬豸并瑞麥八月辛卯詔給天
水郡王孫及天水郡公壻俸祿丙申老人星見乙巳謚太
皇太后曰欽仁皇后戊申葬恭陵十二月癸未朔日有食
之

四年正月癸丑朔宋高麗夏遣使來賀甲寅詔以去年宋
幣賜始祖以下宗室己未以宋使王倫爲平州轉運使既
受命復辭罪其反覆誅之乙丑陝西進嘉禾十有二莖莖
皆七穗己巳萬壽節宋高麗夏遣使來賀乙亥上祭欽仁

皇后哭盡哀二月癸未上如東京丙申次百泊河春水丁酉回鶻遣使來賀以粘合韓奴報之五月辛亥朔次薰風殿六月辛巳朔日有食之七月庚午建原廟于東京八月癸未殺魏王道濟九月乙酉上如東京壬子畋于沙河射虎獲之十月乙卯遣使祭遼主陵辛酉詔薰風殿二十里內及巡幸所過五里內並復一歲癸酉行臺左丞相張孝純薨十一月壬辰立借債飢民酬賞格甲辰以河朔諸郡地震詔復百姓一年其壓死無人收葬者官爲歛藏之陝西蒲解汝蔡等處因歲饑流民典顧爲奴婢者官給絹贖爲良放還其鄉十一月己酉上獵于海島十二月甲午至

東京

五年正月丁未朔宋高麗夏遣使來賀癸亥萬壽節宋高麗夏遣使來賀二月乙未次濟州春水三月戊辰次天開殿五月戊午初用御製小字壬申以平章政事勗諫上爲止酒仍布告廷臣六月乙亥朔日有食之八月戊戌發天開殿九月庚申至自東京十月辛卯增謚太祖閏月戊寅大名府進牛生麟壬辰懷州進嘉禾十二月戊申增謚始祖以下十帝及太宗徽宗丁巳赦

六年正月辛未朔宋高麗夏遣使來賀壬申封太祖諸孫爲王乙亥畋于謀勒甲申還京師丁亥萬壽節宋高麗夏

遣使來賀庚寅以邊地賜夏國壬辰如春水帝從禽導騎
悞入大澤中帝馬陷因步出亦不罪導者乙未封偃喝爲
王二月丙寅右丞相韓企先薨三月壬申以阿离補爲行
臺右丞相四月庚子朔上至自春水以同判大宗正事宗
固爲太保右丞相兼中書令戊午行臺右丞相阿离補薨
五月壬申高麗王楷薨辛卯以左宣徽使劉筈爲行臺右
丞相六月乙巳殺宇文虛中及高士談乙丑遣使弔祭高
麗并起復嗣王硯九月戊辰朔以許王破汴睿宗平陝西
鄭王克遼及婁室銀朮可皆有大功並爲立碑戊寅曹王
劉豫薨是歲遣粘割韓奴招耶律大石被害

七年正月乙丑朔宋高麗夏遣使來賀辛巳萬壽節宋高麗夏遣使來賀癸未以西京鹿園爲民田丁亥太白經天三月戊寅高麗遣使謝弔祭起復四月戊午宴便殿上醉酒殺戶部尚書宗禮六月丁酉殺橫海軍節度使田穀左司郎中奚毅翰林待制邢具瞻及王植高鳳廷王儼趙益興龔夷鑒等七月己巳太白經天曲赦畿內九月太保右丞相宗固薨以都元帥宗弼爲太師領三省事都元帥行臺尚書省事如故平章政事勗爲左丞相兼侍中都點檢宗賢爲右丞相兼中書令行臺右丞相劉筈右丞蕭仲恭爲平章政事李德固爲尚書右丞秘書監蕭肄爲參知政

事十月壬子平章行臺尚書省事奚寶篋十一月癸酉以工部侍郎僕散太鸞爲御史大夫乙亥兵部尚書秉德進三角羊巳卯詔減常膳羊豕五之二癸未以尚書左丞宗憲爲行臺平章政事同判大宗正事亮爲尚書左丞十二月戊午參知政事韓昉罷兵部尚書秉德爲參知政事

八年正月庚申朔宋高麗遣使來賀丙子萬壽節宋高麗遣使來賀二月壬子以哥魯葛波古等爲橫賜高麗夏國使甲寅以大理卿宗安等爲高麗王暉封冊使乙卯上如天開殿四月戊子朔日有食之辛丑遣參知政事秉德等廉察官吏庚戌至自天開殿甲寅遼史成六月乙卯

平章政事蕭仲恭爲行臺左丞相左丞亮爲平章政事都
點檢唐括辨爲尚書左丞高麗王遣使謝封冊七月乙亥
御史大夫僕散太彎罷以侍衛親軍都指揮使阿魯帶爲
御史大夫戊寅以尚書左丞唐括辨奉職不謹杖之八月
戊戌宗弼進太祖實錄上焚香立受之庚子以尚書左丞
相勗領行臺尚書省事右丞相宗賢爲太保尚書左丞相
丙午以行臺左丞相蕭仲恭爲尚書右丞相閏月庚申宰
臣以西林多鹿請上獵上恐害稼不允丙寅太廟成九月
丙申尚書左丞唐括辨罷以左宣徽使稟爲尚書左丞十
月辛酉太師領三省事都元帥越國王宗弼薨十一月壬

辰太白經天乙未左丞相宗賢左丞稟等言州郡長吏當
並用本國人上曰四海之內皆朕臣子若分別待之豈能
致一諺不云乎疑人勿使使人勿疑自今本國及諸色人
量才通用之辛丑以尚書左丞相宗賢爲左副元帥平章
政事亮爲尚書左丞相兼侍中參知政事秉德爲平章政
事庚戌左副元帥宗賢復爲太保左丞相左副元帥如故
十二月乙卯以右丞相蕭仲恭爲太傅領三省事左丞相
亮爲尚書右丞相乙亥以左丞相宗賢爲太師領三省事
兼都元帥

九年正月甲申朔宋高麗夏遣使來賀戊戌太師領三省

事都元帥宗賢罷領行臺尚書省事昺爲太師領三省事
同判大宗正事充爲尚書左丞相右丞相亮兼都元帥庚
子萬壽節宋高麗夏遣使來賀壬寅左丞相充薨丙午以
右丞相亮爲左丞相判大宗正事宗本爲尚書右丞相左
副元帥宗敏爲都元帥南京留守宗賢爲左副元帥兼西
京留守己酉宗賢復爲太保領三省事二月甲寅會寧牧
唐括辨復爲尚書左丞尚書左丞稟爲行臺平章政事三
月癸未朔日有食之辛丑以司空宗本爲尚書右丞相兼
中書令左丞相亮爲太保領三省事四月壬申夜大風雨
雷電震壞寢殿鴟尾有火入上寢燒幃幔帝趨別殿避之

丁丑有龍關於利州榆林河水上大風壞民居官舍瓦木
人畜皆飄颺十數里死傷者數百人五月戊子以四月壬
申丁丑天變肆赦命翰林學士張鈞草詔參知政事蕭肄
適其語以爲誅謗上怒殺鈞是日曲赦上京囚庚寅出太
保領三省事亮領行臺尚書省事戊申武庫署令耶律八
斤妄稱上言宿直將軍蕭榮與胙王元爲黨誅之六月己
未以都元帥宗敏爲太保領三省事兼左副元帥左丞相
宗賢兼都元帥八月庚申以劉筈爲司空行臺右丞相如
故宰臣議徙遼陽渤海之民於燕南從之侍從高壽星等
當遷訴於后后以白上上怒議者校平章政事秉德殺左

司郎中三合九月丙申以領行臺尚書省事亮復爲平章政事戊戌以右丞相宗本爲太保領三省事左副元帥宗敏領行臺尚書省事平章政事秉德爲尚書左丞相兼中書令司空劉筈爲平章政事庚子以御史大夫宗甫爲參知政事十月乙丑殺北京留守胙王元及弟安武軍節度使查剌左衛將軍特思大赦癸酉以翰林學士京爲御史大夫十一月癸未殺皇后裴滿氏召胙王妃撒外入宮戊子殺故鄧王子阿懶達懶癸巳上獵于忽刺渾土溫遣使殺德妃烏古論氏及夾谷氏張氏十二月己酉朔上至自獵所丙辰殺妃裴滿氏於寢殿而平章政事亮因群臣震

恐與所親駙馬唐括辨寢殿小底大興國護衛十人長忽
士阿里出虎等謀爲亂丁巳以忽土阿里出虎當內直命
省令史李老僧語興國夜二鼓與國竊符矯詔開宮門召
辨等亮懷刀與其妹夫特斲隨辨入至宮門守者以辨駙
馬不疑內之及殿門衛士覺抽刃刼之莫敢動忽土阿里
出虎至帝前帝求榻上常所置佩刀不知已爲興國易置
其處忽土阿里出虎遂進弑帝亮復前手刀之血濺滿其
面與衣帝崩時年三十一左丞相秉德等遂奉亮坐羅拜
呼萬歲立以爲帝降帝爲東昏王葬于皇后裴滿氏墓中
貞九三年改葬于大房山蓼香甸諸王同兆域大定初追

謚武靈皇帝廟號閔宗陵曰思陵別立廟十九年升祔于
太廟增謚弘基續武莊靖孝成皇帝二十七年改廟號熙
宗二十八年以思陵狹小改葬于峨眉谷仍號思陵詔中
外

贊曰熙宗之時四方無事敬禮宗室大臣委以國政其繼
體守文之治有足觀者末年酗酒妄殺人懷危懼所謂前
有諛而不見後有賊而不知馴致其道非一朝一夕故也

本紀第四

本紀第五

金史五

開府儀同三司柱國錄軍國重事節度使書丞相監修

國史領

經筵事都總裁

朕朕奉

勅修

海陵

廢帝海陵庶人亮字元功本諱迪古乃遼王宗幹第二子也母大氏天輔六年壬寅歲生天眷三年年十八以宗室子為奉國上將軍赴梁王宗弼軍前任使以為行軍萬戶遷驃騎上將軍皇統四年加龍虎衛上將軍為中京留守遷光祿大夫為人慄急多猜忌殘忍任數初熙宗以太祖嫡孫嗣位亮意以為宗幹太祖長子而已亦太祖孫遂懷

覬覦在中京專務立威以厭伏小人猛安蕭裕傾險敢決
亮結納之每與論天下事裕揣知其意因勸海陵舉大事
語在裕傳七年五月召為同判大宗正事加特進十一月
拜尚書右丞務攬持權柄用其腹心為省臺要職引蕭裕
為兵部侍郎一日因召對語及太祖創業艱難亮因嗚咽
流涕熙宗以為忠八年六月拜平章政事十一月拜右丞
相九年正月兼都元帥熙宗使小底大興國賜亮生日悼
后亦附賜禮物熙宗不悅杖興國百追其賜物海陵由此
不自安三月拜太保領三省事益邀求人譽引用勢望子
孫結其驩心四月學士張鈞草詔忤旨死熙宗問誰使為

之左丞相宗賢對曰太保實然熙宗不悅遂出為領行臺
尚書省事過中京與蕭裕定約而去至良鄉召還海陵莫
測所以召還之意大恐既至復為平章政事由是益危迫
熙宗嘗以事杖左丞唐括辯及右丞相秉德辯乃與大理
卿烏帶謀廢立而烏帶先以此謀告海陵他日海陵與辯
語及廢立事曰若舉大事誰可立者辯曰胙王常勝乎問
其次曰鄧王子阿懶亮曰阿懶屬疎安得立辯曰公豈有
意邪海陵曰果不得已捨我其誰於是旦夕相與密謀護
衛將軍特思疑之以告悼后曰辯等公餘每竊竊聚語竊
疑之后以告熙宗熙宗怒召辯謂曰爾與亮謀何事將如

我何杖之亮因此忌常勝阿懶且惡特思因河南兵士孫進自稱皇弟按察大王而熙宗之弟止有常勝查刺海陵乘此構常勝查刺阿懶達懶熙宗使特思鞫之無狀海陵曰特思鞫不以實遂俱殺之護衛十人長僕散忽土舊受宗幹恩徒單阿里出虎與海陵姻家大興國給事寢殿時時乘夜從主者取符鑰歸家以為常興國嘗以李老僧屬海陵得為尚書省令史故使老僧結興國為內應而興國亦以被杖怨熙宗遂與亮約十二月丁巳忽土阿里出虎內直是夜興國取符鑰啓門納海陵秉德辯烏帶徒單貞李老僧等入至寢殿遂弑熙宗秉德等未有所屬忽土曰

始者議立平章今復何疑乃奉海陵坐皆拜稱萬歲詐以
熙宗欲議立后召大臣遂殺曹國王宗敏左丞相宗賢是
日以秉德爲左丞相兼侍中左副元帥辯爲右丞相兼中
書令烏帶爲平章政事忽土爲左副點檢阿里出虎爲右
副點檢貞爲左衛將軍興國爲廣寧尹於是自太師領三
省事勛以下二十人進爵增職各有差己未大赦改皇統
九年爲天德元年叅知政事蕭肄除名鎮南統軍孛極爲
尚書左丞賜左丞相秉德右丞相辯平章政事烏帶廣寧
尹興國點檢忽土阿里出虎左衛將軍貞尚書省令史老
僧辯父刑部尚書阿里等錢絹馬牛羊有差甲子誓太祖

廟召秉德辯烏帶忽土阿里出虎興國六人賜誓券丙寅以燕京路都轉運使劉麟爲叅知政事癸酉太傅領三省事蕭仲恭尚書右丞稟罷以行臺尚書左丞溫都思忠爲右丞乙亥追謚皇考太師憲古弘道文昭武烈章孝睿明皇帝廟號德宗名其故居曰興聖宮宋高麗夏賀正旦使中道遣還

二年正月辛巳以同知中京留守事蕭裕爲秘書監癸巳尊嫡母徒單氏及母大氏皆爲皇太后名徒單氏宮曰永壽大氏宮曰永寧乙巳以勵官守務農時慎刑罰揚側陋恤窮民節財用審才實士事詔中外遣侍衛親軍步軍都

相兼使完顏思恭等以廢立事報諭宋高麗夏國以左丞
相兼左副元帥秉德領行臺尚書省事二月戊申朔封子
元壽爲崇王庚戌降前帝爲東昏王給天水郡公孫女二
人月俸甲子以兵部尚書完顏元宜等克賀宋生日使戊
辰群臣上尊號曰法天膺運睿武宣文大明聖孝皇帝詔
中外永壽永寧兩太后父祖贈官有差以右丞相唐括辯
爲左丞相平章政事烏帶爲右丞相三月丙戌宋高麗遣
使賀即位以弟充爲司徒兼都元帥詔以天水郡王玉帶
歸宋四月戊午殺太傅領三省事宗本尚書左丞相唐括
辯判大宗正府事宗美遣使殺領行臺尚書省事秉德東

京留守宗懿北京留守卞及太宗子孫七十餘人周宋國
王宗翰子孫三十餘人諸宗室五十餘人辛酉以尚書省
譯史蕭玉爲禮部尚書祕書監蕭裕爲尚書左丞司徒充
領三省事封王都元帥如故右丞相烏帶爲司空左丞相
兼侍中平章政事劉筈爲尚書右丞相兼中書令左丞宗
義右丞溫都思忠爲平章政事叅知政事劉麟爲尚書右
丞殿前左副點檢僕散忽土爲殿前都點檢五月戊子以
平章行臺尚書省事右副元帥大臬爲行臺尚書右丞相
元帥如故壬辰以左副元帥撒剌喝爲行臺尚書左丞相
元帥如故同判大宗正事宗安爲御史大夫六月丙午朔

高麗遣使賀即位甲子太廟初設四神門及四隅果愚七月己丑司空左丞相兼侍中烏帶罷以平章政事溫都思忠爲左丞相尚書左丞蕭裕爲平章政事右丞劉麟爲左丞侍衛親軍步軍都指揮使完顏思恭爲右丞叅知政事張浩丁憂起復如故戊戌夏國遣使賀即位及受尊號八月戊申以司徒充爲太尉領三省事都元帥如故以禮部尚書蕭玉爲叅知政事九月甲午立惠妃徒單氏爲皇后十月癸卯太師領三省事勛致仕辛未殺太皇太妃蕭氏及其子任王偁喝使使殺行臺左丞相左副元帥撒離喝于汴并殺平章政事宗義前工部尚書謀里野御史大夫

宗安皆夷其族以魏王幹帶之孫活里甲好脩飾亦族之十一月癸未尚書右丞相劉箬罷以會寧牧徒單恭爲平章政事尚書左丞劉麟右丞完顏思恭罷以叅知政事張浩爲尚書右丞乙酉以行臺尚書左丞張通古爲尚書左丞丙戌白虹貫日丁亥以太后旨稱令旨戊子以十二事戒約官吏己丑命庶官許求次室二人百姓亦許置妾十二月癸卯朔詔去羣臣所上尊號丙午初定襲封衍聖公俸格命外官去所屬百里外者不許叅謁百里內者往還不得過三日癸丑立太祖射碑于統石烈部中上及皇后致奠于碑下甲寅野人來獻異香却之乙卯有司奏慶雲

見上曰朕何德以當此自今瑞應毋得上聞若有妖異當以諭朕使自警焉己未罷行臺尚書省改都元帥府爲樞密院詔改定繼絕法以右副元帥大臬爲尚書右丞相兼中書令叅知行臺尚書省事張中孚爲叅知政事都元帥充爲樞密使太尉領三省事如故元帥左監軍昂爲樞密副使刑部尚書趙資福爲御史大夫

三年正月癸酉朔宋夏高麗遣使來賀乙亥叅知政事蕭玉丁憂起復如故癸未立春觀擊土牛丁亥初造燈山于宮中戊子生辰宋高麗夏遣使來賀甲午初置國子監謂御史大夫趙資福曰汝等多徇私情未聞有所彈劾朕甚

不取自今百官有不法者必當舉劾無憚權貴乙未上出獵宰相以下辭於近郊上駐馬戒之曰朕不惜高爵厚祿以任汝等比聞事多留滯豈汝等苟圖自安不以民事爲念耶自今朕將察其勤惰以爲賞罰其各勉之丁酉白虹貫日二月丁巳還宮三月庚寅以翰林學士劉長言等爲宋生日使壬辰詔廣燕城建宮室己亥謂侍臣曰昨太子生日皇后獻朕一物大是珍異卿試觀之即出諸絳囊中乃田家稼穡圖后意太子生深宮之中不知民間稼穡之艱難故以爲獻朕甚賢之四月丙午詔遷都燕京辛酉有司圖上燕城宮室制度營建陰陽五姓所宜海陵曰國家

吉凶在德不在地使桀紂居之雖卜善地何益使堯舜居之何用卜爲丙寅罷歲貢鷹隼沂州男子吳真犯法當死有司以其母老疾無侍爲請命官與養濟著爲令閏月辛未朔命尚書右丞張浩調選燕京仍諭浩無私徇丙子命太官常膳惟進魚肉舊貢鵝鴨等悉罷之丁丑罷皇統間苑中所養禽獸歸德軍節度使阿魯補以撤官舍材木權私第賜死戊戌詔朝官稱疾不治事者尚書省令監察御史與太醫同診視無實者坐之五月壬子以戒敕宰相以下官詔中外戊辰宰臣請益嬪御以廣嗣續上命徒單貞語宰臣前所誅黨人諸婦人中多朕中表親欲納之宮中

平章政事蕭裕不可上不從遂納宗本子莎魯斡宗固子胡里剌胡失打秉德弟乂里等妻宮中六月丙子殺太府監完顏馮六宋遣使祈請山陵不許九月庚戌賜燕京役夫帛人一匹以東京路兵馬都總管府判官蕭子敏爲高麗生日使修起居注蕭彭哥爲夏國生日使十月己巳殺蘭子山猛安蕭拱以右副點檢不朮魯阿海等爲宋正旦使十一月癸亥詔罷世襲萬戶官前後賜姓人各復本姓十二月戊辰杖壽寧縣主徐輦癸酉獵于近郊乙酉還宮是歲子崇王元壽薨

四年正月丁酉朔宋高麗夏遣使來賀羣臣請立皇太子

從之戊戌初定東宮官屬立捕盜賞格癸卯太白經天壬子生辰宋高麗夏遣使來賀癸亥朝謁世祖太祖太宗德宗陵甲子還宮二月丁卯立子光英爲皇太子庚午詔中外甲戌如燕京昭義軍節度使蕭仲宣家奴告其主怨謗上曰仲宣之姪迪輦阿不近以誹謗誅故敢妄愬命殺告者迪輦阿不者蕭拱也戊子次泰州三月丙申朔以刑部尚書田秀穎等爲宋生日使四月丙寅朔有司請今歲河南北選人並赴中京銓注從之壬辰上自泰州如涼陘五月丁酉獵于立列只山甲寅賜獵士人一羊乙卯次臨潢府丁巳太白經天六月甲子朔駐綿山戊寅權楚底部猛

安那野伏誅七月癸卯命崇義軍節度使烏帶之妻唐括定哥殺其夫而納之八月癸亥朔獵于途你山甲戌以侍御史保魯鞠事不實杖之丙子次于鐸瓦九月甲午次中京丙午尚書右丞相大臭罷殺太府少監劉景以都水使者完顏麻潑爲高麗生日使吏部郎中蕭中立爲夏國生日使十月壬戌朔使使奉遷太廟神主御史大夫趙資福罷甲申以太子詹事張用直等爲賀宋正旦使殺太祖長公主兀魯杖罷其夫平章政事徒單恭封其侍婢忽撻爲國夫人恭之兄定哥初尚兀魯定哥死恭強納焉而不相能又與侍婢忽撻不協忽撻得幸于后遂譖于上故見殺

而并罷恭十一月戊戌以咸平尹李德固爲平章政事辛丑買珠于烏古迪烈部及蒲與路禁百姓私相貿易仍調兩路民夫採珠一年戊申以前平章政事徒單恭爲司徒十二月甲子斬妾人敲仙于中京市辛未以汴京路都轉運使左瀛等爲賀宋正旦使庚寅太尉領三省事樞密使充薨

貞元元年正月辛卯朔上不視朝詔有司受宋高麗夏回紇貢獻丙午生辰宋高麗夏遣使來賀以中京留守高楨爲御史大夫二月庚申上自中京如燕京三月辛亥上至燕京初備法駕甲寅親選良家子百三十餘人充後宮乙

卯以遷都詔中外改元貞元改燕京爲中都府曰大興汴
京爲南京中京爲北京丙辰以司徒徒單恭爲太保領三
省事平章政事蕭裕爲右丞相兼中書令右丞張浩左丞
張通古爲平章政事叅知政事張中孚爲左丞蕭玉爲右
丞平章政事李德固爲司空左宣徽使劉萼爲叅知政事
樞密副使昂爲樞密使工部尚書僕散師恭爲樞密副使
四月辛酉以右宣徽使紇石烈撒合輦等爲宋賀生日使
辛未特封唐括定哥爲貴妃戊寅皇太后大氏崩五月辛
卯殺弟西京留守蒲家西京兵馬完顏謨盧瓦編修官圓
福奴通進孛迭坐與蒲家善并殺之乙卯以京城隙地賜

朝官及衛士六月乙丑以安國軍節度使耶律恕爲叅知政事七月戊子朔元賜朝官京城隙地徵錢有差八月壬戌司空李德固薨禁中都路捕射麋兔戊寅賜營建宮室工匠及役夫帛九月丁亥朔以翰林待制謀良虎爲夏國生日使吏部郎中宓合山爲高麗生日使十月丁巳獵于良鄉封料石岡神爲靈應王初海陵嘗過此祠持杯校禱曰使吾有天命當得吉卜投之吉又禱曰果如所卜他日當有報否則毀爾祠宇投之又吉故封之戊午還宮壬戌有司言太后園陵未畢合傳冬享及祫祭從之丙子命內外官聞大功以上喪止給當日假若父母喪聽給假三日

著爲令十一月丙戌朔定州獻嘉禾詔自今不得復進己丑瑤池殿成丙申以戶部尚書蔡松年等爲賀宋正旦使戊戌左丞相耨盪溫都思忠致仕庚戌以樞密使昂爲左丞相樞密副使僕散師恭爲樞密使十二月太白經天戊午特賜貴妃唐括定哥家奴孫梅進士及第壬戌以簽書樞密院事南撒爲樞密副使辛未封所納皇叔曹國王宗敏妃阿懶爲昭妃丙子貴妃唐括定哥坐與舊奴姦賜死閏月乙酉朔殺護衛特謨葛癸巳定社稷制度太白經天癸卯以太保領三省事徒單恭爲太師領三省事如故命西京路統軍撻懶西北路招討蕭懷忠臨潢府總管馬和

尚烏古迪烈司招討斜野等北巡

二年正月甲寅朔上不豫不視朝賜宋高麗夏使就館燕
庚申太白經天尚書右丞相蕭裕與前真定尹蕭馮家奴
前御史中丞蕭招折博州同知遙設等謀反伏誅詔中外
已巳生辰宋高麗夏遣使來賀二月甲申朔以平章政事
張浩爲尚書右丞相兼中書令甲午以尚書右丞蕭玉爲
平章政事前河南路統軍使張暉爲尚書右丞西北路招
討使蕭好胡爲樞密副使三月戊辰夏遣使賀遷都丙戌
幸大興府及都轉運使司遣薦舍桃于衍慶宮五月癸丑
朔日有食之避正殿勅百官勿治事己未詔自今每月上

七日不奏刑名尚食進饌不進肉丁卯始置交鈔庫設使
副貲丁丑太原尹徒單阿里出虎伏誅復命其子朮斯刺
乘傳焚其骨擲水中七月庚申初設鹽鈔香茶文引印造
庫使副丙子叅知政事耶律恕罷八月丙午以左丞相昂
去衣杖其弟婦命杖之戊申以御史大夫高楨爲司空御
史大夫如故九月己未常武殿擊鞠令百姓縱觀辛酉以
吏部尚書蕭曠爲叅知政事癸亥獵于近郊丁卯次順州
太師領三省事徒單恭薨是夜還宮乙亥復獵于近郊十
月庚辰朔殺廣寧尹韓王亨庚寅還宮庚子以左丞相致
仕溫都思忠起爲太傅領三省事以刑部侍郎白彥恭等

爲賀宋正旦使十一月戊辰上命諸從姊妹皆分屬諸妃
出入禁中與爲淫亂卧內徧設地衣裸逐爲戲是月初置
惠民局高麗遣使謝賜生日十二月乙酉以太傅溫都思
忠爲太師領三省事如故平章政事張通古爲司徒平章
政事如故

三年正月己酉朔宋高麗夏遣使來賀辛酉以判東京留
守大臬爲太傅領三省事甲子生辰宋高麗夏遣使來賀
二月壬午以左丞相昂爲太尉樞密使右丞相張浩爲左
丞相兼侍中樞密使僕散師恭爲右丞相兼中書令尚書
左丞張中孚罷右丞張暉爲平章政事叅知政事劉夢爲

左丞叅知政事蕭賾爲右丞吏部尚書蔡松年爲叅知政事三月壬子以左丞相張浩平章政事張暉每見僧法寶必坐其下失大臣體各杖二十僧法寶妄自尊大杖二百乙卯命以大房山雲峯寺爲山陵建行宮其麓庚午以左司郎中李通爲賀宋生日使夏四月丁丑朔昏霧四塞日無光凡十有七日五月丁未朔日有食之癸丑南京大內火乙卯命判大宗正事京等如上京奉遷太祖太宗梓宮丙寅如大房山營山陵六月丙戌登寶昌門觀角抵百姓縱觀乙未命右丞相僕散師恭大宗正丞胡拔魯如上京奉遷山陵及迎永壽宮皇太后七月癸丑太白晝見辛酉

如大房山杖提舉營造官吏部尚書耶律安禮等乙亥還宮八月壬午如大房山甲申啓土賜役夫人絹一匹是日還宮甲午遣平章政事蕭玉迎祭祖宗梓宮於廣寧乙未增置教坊人數庚子杖左宣徽使敬嗣暉同知宣徽事烏居仁及尚食官九月戊申平章政事張暉迎祭梓宮于宗州乙卯上謂宰臣及左司官曰朝廷之事尤在愼密昨授張中孚趙慶襲官除書未到先已知之皆汝等泄之也敢復爾者殺無赦己未如大房山庚申還宮丙寅以殿前都點檢納合椿年爲叅知政事丁卯上親迎梓宮及皇太后于沙流河命左右持杖二束跽太后前曰某不孝久失溫

清願痛咎之太后掖起之曰凡民有子克家猶愛之況我有子如此叱持杖者退庚午獵親射麋以薦梓宮壬申至自沙流河十月丙子皇太后至中都居壽康宮戊寅權奉安太廟神主于延聖寺致奠梓宮于東郊舉哀己卯梓宮至中都以大安殿爲丕承殿安置壬午命省部諸司便服治事不奏死刑一月辛卯告于丕承殿乙未如散宮冊謚永寧皇太后曰慈憲皇后丁酉大房山行宮成名曰磐寧戊戌還宮己亥以翰林學士承旨耶律歸一等爲賀宋正旦使十一月乙巳朔梓宮發丕承殿戊申山陵禮成甲寅詔內外大小職官覃遷一重貞元四年租稅並與放免軍

士久於屯戍不經替換者人賜絹三匹銀三兩羣臣稱賀
丙辰燕百官於泰和殿丁卯奉安神主于太廟戊辰群臣
稱賀辛未獵于近郊十二月己丑還宮木冰乙未上朝太
后于壽康宮己亥太傅領三省事大臬薨親臨哭之命有
司廢務及禁樂三日

正隆元年正月癸卯朔宋高麗夏遣使來賀己酉羣臣奉
上尊號曰聖文神武皇帝上自九月廢朝常數月不出有
急奏召左右司郎中省于卧内庚戌始視朝戊午生辰宋
高麗夏遣使來賀乙丑觀角抵戲罷中書門下省以太師
領三省事溫都思忠爲尚書令太尉樞密使昂爲太保右

丞相僕散師恭爲太尉樞密使左丞劉萼右丞蕭賸罷叅
知政事蔡松年爲尚書右丞樞密副使蕭懷忠罷吏部尚
書耶律安禮爲樞密副使平章政事蕭玉爲右丞相平章
政事張暉罷不置平章政事官二月癸酉朔改元正隆大
赦庚辰御宣華門觀迎佛賜諸寺僧絹五百匹綵五十段
銀五百兩辛巳改定內外諸司印記乙未司徒張通古致
仕庚子謁山陵辛丑還都三月壬寅朔始定職事官朝叅
等格仍罷兵衛庚申以左宣徽使敬嗣暉等爲賀宋生日
使四月太尉樞密使僕散師恭以父憂起復如故五月辛
亥脩容安氏閣女御爲妖所憑舞譟宮中命殺之是月頒

行正隆官制六月庚辰天水郡公趙桓薨丙戌以尚書右丞蔡松年爲左丞樞密副使耶律安禮爲右丞駙馬都尉烏古論當海爲樞密副使七月己酉命太保昂如上京奉遷始祖以下梓宮八月丁丑如大房山行視山陵十月乙酉葬始祖以下十帝于大房山丁酉還宮閏月己亥朔山陵禮成羣臣稱賀甲辰回鶻使使寅朮烏籠骨來貢庚寅杖右丞相蕭玉左丞蔡松年右丞耶律安禮御史中丞馬諷等十一月己巳朔以右司郎中梁鉞等爲賀宋正旦使癸巳禁二月八日迎佛

二年正月戊辰朔宋高麗夏遣使來賀庚辰太白晝見癸

未生辰宋高麗夏遣使來賀庚寅以工部侍郎韓錫同知宣徽院事錫不謝杖百二十奪所授官二月辛丑初定太廟時享牲牢禮儀癸卯改定親王以下封爵等第命置局追取存亡告身存者二品以上死者一品參酌削降公私文書但有王爵字者皆立限毀抹雖墳墓碑志並發而毀之三月丙寅朔高麗遣使賀受尊號四月戊戌追降景宣皇帝爲遼王以簽書宣徽院事張喆爲橫賜高麗使宿直將軍溫敦幹喝爲橫賜夏國使六月乙未叅知政事納合椿年薨以禮部尚書耶律守素等爲賀宋生日使八月癸卯始置登聞院甲寅罷上京留守司九月乙丑以宿直將

軍僕散烏里黑爲夏國生日使戊子罷護駕軍置龍翔虎
步軍罷尚書省文資令史出爲外官是秋中都山東河東
蝗十月壬寅命會寧府毀舊宮殿諸大族第宅及儲慶寺
仍夷其址而耕種之丁未禁賣古器入他境乙卯初鑄銅
錢十一月辛未以侍衛親軍副指揮使高助不古等爲賀
宋正旦使十二月己亥以侍衛親軍都指揮使紇石烈良
弼爲叅知政事

三年正月壬戌朔宋高麗夏遣使來賀丙寅子矧思阿不
死殺太醫副使謝友正及其乳母等丁丑生辰宋高麗夏
遣使來賀己卯杖右諫議大夫楊伯雄二月壬辰朔都城

及京兆初置錢監甲午遣使檢視隨路金銀銅鐵冶三月
辛酉朔司天奏日食候之不見命自今遇日食面奏不須
頒告辛巳以兵部尚書蕭恭等爲賀宋生日使四月丙辰
樞密副使烏古論當海罷以北京留守張暉爲樞密副使
六月壬辰鎰入京師七月庚申封子廣陽爲滕王甲申以
右丞相蕭玉爲司徒尚書左丞蔡松年爲右丞相右丞耶
律安禮爲左丞叅知政事紇石烈良弼爲右丞左宣徽使
敬嗣暉戶部尚書李通爲叅知政事九月己未太白經天
甲子滕王廣陽薨庚午以宿直將軍阿魯保爲夏國生日
使丁丑以教坊提點高存福爲高麗生日使辛巳遷中都

屯軍二猛安於南京遣吏部尚書李惲等分地安置十月
戊戌詔尚書省凡事理不當者許詣登聞檢院投狀院類
奏覽訖付御史臺理問十一月辛酉以工部尚書蘇保衡
等爲賀宋正旦使癸亥詔有司勤政安民癸未尚書左丞
耶律安禮罷叅知政事李通以憂制起復如故詔左丞相
張浩叅知政事敬嗣暉營建南京宮室十二月乙卯以樞
密副使張暉爲尚書左丞歸德尹致仕高召和式起爲樞
密副使

四年正月丙辰朔宋高麗夏遣使來賀上朝太后于壽康
宮丁巳御史大夫高植薨庚申更定私相越境法並論死

辛酉罷鳳翔唐鄧穎蔡鞏洮膠西諸榷場置場泗州辛未
生辰宋高麗夏遣使來賀二月己丑以左宣徽使許霖爲
御史大夫丁未修中都城造戰船于通州詔諭宰臣以伐
宋事調諸路猛安謀克軍年二十以上五十以下者皆籍
之雖親老丁多亦不許留侍三月丙辰朔遣兵部尚書蕭
恭經畫夏國邊界遣使分詣諸道總管府督造兵器四月
辛丑命增山東路泉水畢括兩營兵士廩給庚戌詔諸路
舊貯軍器並致于中都時方建宮室於南京又中都與四
方所造軍器材用皆賦於民箭翎一尺至千錢村落間往
徃椎牛以供筋革至於烏鵲狗彘無不被害者辛亥尚書

左丞張暉御史大夫許霖罷以大興尹徒單貞爲樞密副使以祕書監王可道等爲賀宋生日使八月詔諸路調馬以戶口爲差計五十六萬餘疋富室有至六十疋者仍令戶自養飼以俟己卯尚書右丞相蔡松年薨九月以翰林待制完顏達紀爲高麗生日使宿直將軍加古撻懶爲夏國生日使十月乙亥獵于近郊觀造船于通州賜尚書右丞紇石烈良弼樞密副使徒單貞佩刀入宮十一月甲辰以翰林侍講學士施宜生等爲賀宋正旦使十二月乙卯宋遣使告母韋氏哀甲子太白晝見乙丑以左副點檢大懷忠等爲宋弔祭使乙亥太醫使祈宰上疏諫伐宋殺之

五年正月庚辰朔宋高麗夏遣使來賀乙未生辰宋高麗夏遣使來賀二月壬子宋遣使獻母后遺留物丁卯太白晝見辛未河東陝西地震鎮戎德順軍大風壞廬舍人多壓死甲戌遣引進使高植刑部郎中海狗分道監視所獲盜賊並凌遲處死或鋸灼去皮截手足仍戒屯戍千戶謀克等後有獲者並處死總管府官亦決罰三月辛巳東海縣民張旺徐元等反遣都水監徐文步軍指揮使張弘信同知大興尹事李惟忠宿直將軍蕭阿剌率舟師九百浮海討之命之曰朕意不在一邑將試舟師耳庚子以司徒判大宗正事蕭玉爲御史大夫司徒如故尚書右丞統石

烈良弼爲左丞橫海軍節度使致仕劉長言起爲右丞四月庚戌昭妃蒲察阿里忽有罪賜死甲寅宿州防禦使耶律翼使宋失體杖二百除名甲戌太白晝見六月徐文等破賊張旺徐元東海平七月辛巳詔東海縣徐元張旺誣誤者並釋之壬午以張弘信被命討賊稱疾逗遛萊州與妓樂飲燕杖之二百癸卯遣使簽諸路漢軍八月丙午朔日有食之辛亥命權貨務并印造鈔引庫起赴南京己巳樞密副使徒單貞罷以太子少保徒單永年爲樞密副使辛未謁山陵見田間穫者問其豐耗以衣賜之九月己卯還宮十月庚午遣護衛完顏普連等二十四人督捕山東

河東河北中都盜賊籍諸路水手得三萬人十一月乙酉以濟南尹僕散烏者等爲賀宋正旦使尚書右丞劉長言罷命親軍司以所掌付大興府置左右驍騎都副指揮使隸點檢司步軍都指揮使隸宣徽院十二月癸丑禁中都河北山東河南河東京兆軍民網捕禽獸及畜養雕隼者戊辰禁朝官飲酒犯者死三國人使燕飲者非

六年正月甲戌朔宋高麗夏遣使來賀丁丑判大宗正徒單貞益都尹京安武軍節度使奕金吾衛上將軍阿速飲酒以近屬故杖貞七十餘皆杖百壬午上將如南京以司徒御史大夫蕭玉爲大興尹司徒如故樞密副使徒單永

年罷以都點檢紇石烈志寧爲樞密副使己丑生辰宋高麗夏遣使來賀癸巳命叅知政事李通諭宋使徐度等曰朕昔從梁王軍樂南京風土常欲巡幸今營繕將畢功期以二月末先往河南帝王巡守自古有之以淮右多隙地欲校獵其間從兵不踰萬人况朕祖宗陵廟在此安能久于彼乎汝等歸告汝主令有司宣諭朕意使淮南之民無懷疑懼庚子詔自中都至河南府所過州縣調從獵騎士二千辛丑殺蒲察阿虎迭女义察义察慶宜公主出幼鞠宮中上屢欲納之太后不可至是以罪殺之二月乙巳杖衛王襄之妃及左宣徽使許霖甲寅以叅知政事李通爲

尚書右丞己未禁扈從縱獵擾民庚申徵諸道水手運戰
船癸亥發中都丙寅次安肅州三月己卯改河南北邳山
爲太平山稱舊名者以違制論丁亥將至獲嘉有男子上
書言事斬之所言莫得聞癸巳次河南府因出獵幸汝州
溫湯視行宮地自中都至河南所過麥皆爲空復禁扈從
毋輒離次及游賞飲酒犯者罪皆死而莫有從者詔內地
諸猛安赴山後牧馬俟秋並發第究之妻烏延氏有罪賜
死烏延氏之弟南京兵馬副都指揮使習泥亦以罪誅四
月丁未詔百官先赴南京治事尚書省樞密院大宗正府
勸農司太府少府皆從行吏戶兵刑部四方館都水監大

理司官各留一員以簽書樞密院事高景山等爲賀宋生
日使戊申詔汝州百五十里內州縣量遣商賈赴溫湯置
市詔有司移問宋人蔡穎壽諸州對境創置堡戍者庚戌
發河南府契丹不補自山馳下伏道左自陳破東海賊有
功爲李惟忠所抑立命斬之丁卯次溫湯誠扈從毋輒過
汝水上獵奔鹿突之墮馬嘔血數日遣使徵諸道兵五月
庚辰太師尚書令耨盪溫都思忠薨契丹諸部反遣右將
軍蕭禿剌等討之六月癸卯命樞密使僕散師恭西京留
守蕭懷忠將兵一萬討契丹諸部上自汝州如南京壬戌
次南京近郊左丞相張浩率百官迎謁是夜大風壞承天

門鷓尾癸亥上備法駕入于南京七月丁亥以左丞相張
浩爲太傅尚書令司徒大興尹蕭玉爲尚書左丞相吏部
尚書白彥恭爲樞密副使樞密副使紇石烈志寧爲開封
尹安武軍節度使徒單貞爲御史大夫己丑賜從駕從行
從軍及千戶謀克錢帛大括天下羸馬殺亡遼耶律氏宋
趙氏子男凡百三十餘人八月壬寅單州賊杜奎據城叛
遣都點檢耶律湛右驍騎副都指揮使大磐討之以樞密
副使白彥恭爲北面兵馬都統開封尹紇石烈志寧副之
中都留守完顏穀亨爲西北面兵馬都統西北路招討使
唐括孛古的副之討契丹癸丑以諫伐宋弒皇太后徒單

氏于寧德宮仍命即宮中焚之棄其骨水中并殺其侍婢等十餘人癸亥殺右將軍蕭禿剌護衛十人長幹盧保族樞密使僕散師恭北京留守蕭曠西京留守蕭懷忠杖尚書令張浩左丞相蕭玉以太常博士張崇爲高麗生日使蕭誼忠爲夏國生日使甲子封所幸太后侍婢高福娘爲鄭國夫人九月庚午朔以太保判大宗正事昂爲樞密使太保如故戊子殺前壽州刺史毛良虎庚寅大名府賊王九據城叛衆至數萬所至盜賊蜂起大者連城邑小者保山澤或以十數騎張旗幟而行官軍莫敢近上又惡聞盜賊事言者輒罪之上自將三十二總管兵伐宋進自壽春以

太保樞密使昂爲左領軍大都督尚書右丞李通副之尚書左丞紇石烈良弼爲右領軍大都督判大宗正烏延蒲盧渾副之御史大夫徒單貞爲左監軍同判大宗正事徒單永年爲右監軍左宣徽使許霖爲左都監河南尹蒲察斡論爲右都監皆從工部尚書蘇保衡爲浙東道水軍都統制益都尹鄭家副之由海道徑趨臨安太原尹劉萼爲漢南道行營兵馬都統制濟南尹僕散烏者副之進自蔡州河中尹徒單合喜爲西蜀道行營兵馬都統制平陽尹張中考副之由鳳翔取散關駐軍以俟後命武勝武平武捷三軍爲前鋒徒單貞別將兵二萬入淮陰甲午上發南

京詔皇后及太子光英居守尚書令張浩左丞相蕭玉叅
知政事敬嗣暉留治省事丙申太白晝見將士自軍中亡
歸者相屬子道曷蘇館猛安福壽東京謀克金住等始授
甲于大名即舉部亡歸從者衆至萬餘皆公言於路曰我
輩今往東京立新天子矣十月乙巳陰迷失道二鼓始達
營所丙午慶雲見東京留守曹國公烏祿即位于遼陽改
元大定大赦數海陵過惡弒皇太后徒單氏殺太宗及宗
翰宗弼子孫及宗本諸王毀上京宮室殺遼豫王宋天水
郡王郡公子孫等數十事丁未大軍渡淮將至廬州獲白
鹿以爲武王白魚之兆漢南道劉萼取通化軍蔣州信陽

軍徒單貞敗宋將王權于盱眙進取揚州前鋒軍至段寨
宋戍兵皆遯去敗宋兵于蔚子橋敗宋兵于巢縣斬二百級
至和州王權夜以兵千餘來襲射却之翼日雨宋人夜焚
其積聚遯去詰旦追之宋人逆戰猛安韓棠軍却遂失利
溫都奧刺奔北武捷軍副總管阿散率猛安謀克力戰却
之王權退保南岸癸亥上次和州阿散等進階賞賚有差
西蜀道徒單合喜駐散關宋人攻秦州臘家城德順州克
之浙東道蘇保衡與宋人戰于海道敗績副統制鄭家死
之十一月庚午左司郎中兀不喝等聞赦入白東京即位
改元事上拊髀歎曰我本欲滅宋後改元大定豈非天命

乎出其書示之即預志改元事也以勸農使完顏元宜爲
浙西道兵馬都統制刑部尚書郭安國副之上駐軍江北
遣武平總管阿隣先渡江至南岸失利上還和州遂進兵
揚州甲午會舟師于瓜洲渡期以明日渡江乙未浙西兵
馬都統制完顏元宜等軍反帝遇弒崩年四十海陵在位
十餘年每飾情貌以御臣下却尚食進鵝以示儉及游獵
頓次不時需索一鵝一鶉民間或用數萬售之有以一牛
易一鶉者或以弊衾覆衣以示近臣或服補綴令記注官
見之或取軍士陳米飯與尚食同進先食軍士飯幾盡或
見民車陷泥澤令衛士下挽俟車出然後行與近臣燕語

輒引古昔賢君以自況顯責大臣使進直言使張仲軻輩
爲諫官而祁宰竟以直諫死比昵羣小官賞無度左右有
曠僚者人或以名呼之即授以顯階常置黃金裋褐間有
喜之者令自取之而淫嬖不擇骨肉刑殺不問有罪至營
南京宮殿運一木之費至二十萬牽一車之力至五百人
宮殿之飾徧傳黃金而後間以五采金屑飛空如落雪一
殿之費以億萬計成而復毀務極華麗其南征造戰艦江
上毀民廬舍以爲材煮死人膏以爲油殫民力如馬牛費
財用如土苴空國以圖人國遂至於敗都督府以其樞置
之南京班荆館大定二年降封爲海陵郡王謚曰煬二月

世宗使小底婁室與南京官遷其柩於寧德宮四月葬于大房山鹿門谷諸王兆域中二十年熙宗既祔廟有司奏曰煬王之罪未正準晉趙王倫廢惠帝自立惠帝反正誅倫廢爲庶人煬帝罪惡過於倫不當有王封亦不當在諸王塋域乃詔降爲海陵庶人改葬于山陵西南四十里

贊曰海陵智足以拒諫言足以飾非欲爲君則弑其君欲伐國則弑其母欲奪人之妻則使之殺其夫三綱絕矣何暇他論至於屠滅宗族翦刈忠良婦姑姊妹盡入嬪御方以三十二總管之兵圖一天下卒之戾氣感召身由惡終使天下後世稱無道主以海陵爲首可不戒哉可不戒哉

本紀第五



本紀第六

金史六

開府儀同三司在國錄軍國重事前書右丞相修國史領經筵事都總裁脫脫奉

勅修

世宗上

世宗光天興運文德武功聖明仁孝皇帝諱雍本諱烏祿
太祖孫睿宗子也母曰貞懿皇后李氏天輔七年癸卯歲
生于上京體貌奇偉美鬚髯長過其腹曾間有七子如北
斗形性仁孝沉靜明達善騎射國人推爲第一每出獵耆
老皆隨而觀之皇統間以宗室子例授光祿大夫封葛王
爲兵部尚書天德初判會寧牧明年判大宗正事改中京

金史卷六
留守俄改燕京未幾爲濟南尹貞元初爲西京留守三年
改東京進封趙王正隆二年例降封鄭國公進封衛國三
年再任留守徙封曹國六年五月居貞懿皇后喪一日方
寢有紅光照室及黃龍見寢室上又嘗夜有大星流入留
守第中是歲東梁水漲溢暴至城下水與城等決女牆石
罅中流入城湍激如涌城中人惶駭上親登城舉酒酹之
水退海陵南伐天下騷動是時籍契丹部人丁壯爲兵部
人不願行以告使者使者燥合畏海陵不以告部人遂反
至是咸平府謀克括里攻陷韓州據咸平將犯東京八月
起復東京留守婆速路兵四百來會討括里復得城中子

弟願爲兵者數百人帝舅興中少尹李石以病免家居遼陽戊午發東京以石主留務賊覘者聞輦鼓聲震天見旌旗蔽野傳言國公兵十萬且至賊衆至瀋州遯去會烏延查刺等敗賊兵還至常安縣海陵使婆速路總管完顏謀衍來討賊以兵屬之九月至東京副留守高存福其女在海陵後宮海陵使存福伺起居適以造兵器餘材造甲數十存福宣言留守何爲造甲密使人以白海陵遂與推官李彥隆託爲擊毬謀不利存福家人以其謀來告平定知軍李蒲速越亦言其事海陵嘗聞上有疾即使近習來觀動靜至是又使謀良虎圖淮北諸王上知之心常隱憂及

討括里還至清河遇故吏六斤乘傳自南來具言海陵殺其母殺兄子檀奴阿里白及樞密使僕散忽土等又曰且遣人來害宗室兄弟矣上聞之益懼及聞存福圖已事且有迹李石勸上早圖之於是以議脩賊事召官屬會清安寺彥隆先到存福累召始來並於座上執之是月復有雲來自西黃龍見雲中十月辛丑南征萬戶完顏福壽高忠建廬萬家奴等自山東率所領兵二萬完顏謀衍自長安率兵五千皆來附謀衍即以臣禮上謁乙巳諸軍入城共擊殺存福等是夜諸軍被甲環衛皇城丙午慶雲見官屬諸軍勸進固讓良久於是親告于太祖廟還御宣政殿即

皇帝位以完顏謀衍爲右副元帥高忠建元帥左監軍完顏福壽右監軍盧萬家奴顯德軍節度使丁未大赦改元大定下詔暴揚海陵罪惡數十事已酉饗將士賜官賞各有差仍給復三年會寧胡里改速頻等路南伐諸軍會尚書省奏請以從軍來者補諸局司承應人及官吏闕員上曰舊人南征者即還何以處之必不可闕者量用新人可也辛亥以利涉軍節度使獨吉義爲參知政事中都留守西北面行營都統完顏穀英將兵三萬駐歸化以爲左副元帥丁巳出內府金銀器物贍軍吏民出財物佐官用者甚衆壬戌以前臨潢尹晏爲左丞相癸亥詔諭南京太傅

尚書令張浩甲子興平軍節度使張玄素上謁尚書省奏
正隆軍興之餘進錢粟者宜量授以官從之詔遣移刺札
八招契丹諸部爲亂者以前肇州防禦使神土懋爲元帥
右都監十一月己巳朔以左丞相晏兼都元帥辛未以戶
部尚書李石爲參知政事己卯詔調民間馬充軍用事畢
還主死者給價阿瑣璋殺同知中都留守事沙离只阿瑣
自稱中都留守璋自稱同知留守事使后家奴等來上表
賀辛巳以如中都期日詔群臣壬午詔中都都轉運使左
淵曰凡宮殿張設毋得增置無役一夫以擾百姓但謹圍
禁嚴出入而已以尚書右司員外郎完顏兀古出爲詔諭

高麗使癸未遣權元帥左都監朴恕右都監神土蔥廣寧
尹僕散渾坦討契丹諸部甲申追尊皇考幽王爲皇帝謚
簡肅廟號睿宗皇妣蒲察氏曰欽慈皇后李氏曰貞懿皇
后群臣上尊號曰仁明聖孝皇帝乙酉追復東昏王帝號
謚武靈廟號閔宗詔中外封子實魯刺爲許王胡土瓦爲
楚王戊子辭謁太祖廟及貞懿皇后園陵己丑如中都次
小口使中都留守宗憲先往壬辰次梁魚務樞密副使北
面行營都統白彥敬南京留守北面行營副統統石烈志
寧以所統軍數來上安武軍節度使爽來歸乙未完顏元
宜等弒海陵於揚州丙申次義州丁酉宋人破陝州防禦

使折可直降同知防禦使事李桑立死之十二月乙卯次三河縣左副元帥完顏穀英來朝丙辰次通州延安尹唐括德溫來朝丁巳至中都戊午謁太祖廟己未御貞元殿受群臣朝庚申以元帥左監軍高忠建等爲報諭宋國使壬戌詔軍士自東京扈從至京師者復三年同知河間尹高昌福上書陳便宜上覽之再三詔內外大小職官陳便宜丙寅詔左副元帥完顏穀英規措南邊及陝西等路事二年正月戊辰朔日有食之伐鼓用幣上徹樂減膳不視朝庚午上謂宰相曰進賢退不肖宰相之職也有才能高於已者或懼其分權往往不肯引置同列朕甚不取卿等

母以此爲心以前翰林學士承旨致仕翟永固爲尚書左丞濟南尹僕散忠義爲右丞都統斜哥副統完顏布輝坐擅易置中都官吏斜哥除名布輝削兩階罷之辛未御太和殿宴百官宗戚命婦賜賚有差壬申勅御史臺檢察六部文移稽而不行行而失當皆舉劾之甲戌除迎賽神佛禁令乙亥如大房山丙子獻享山陵禮畢欲獵而還左丞相晏等諫曰邊事未寧不宜游幸戊寅還宮因諭晏等曰朕常慕古之帝王虛心受諫卿等有言即言毋緘默以自便辛巳以兵部尚書可喜等謀反伏誅詔中外是日賜扈從猛安謀克甲士下至阿里喜有差遣左副點檢蒲察阿

孛罕等賞齊河南將士以前勸農使移刺元宜爲御史大夫詔前工部尚書蘇保衡太子少保高思廉振賜山東百姓粟帛無妻者具姓名以聞庚寅行納粟補官法遣右副元帥完顏謀衍率師討蕭窩幹壬辰上謂宰執曰朕卽位未半年可行之事甚多近日全無敷奏朕深居九重正賴卿等贊襄各思所長以聞朕豈有倦怠癸巳太白晝見甲午上謂宰執曰卿等當參民間利害及時事之可否以時敷奏不可公餘輒從自便優游而已命河北山東陝西等路征南步軍並放還家咸平濟州軍二萬入屯京師丙申以西南路招討使完顏思敬兵部尚書阿鄰督北邊將士

二月己亥前翰林待制大穎以言盜賊忤海陵杖而除名起爲秘書丞補闕馬欽以誦事海陵得革除名庚子詔前戶部尚書梁球戶部郎中耶律道安撫山東百姓招諭盜賊或避賊及避徭役在他所者並令歸業及時農種無問罪名輕重並與原免壬寅太傅尚書令張浩來見癸卯以上初即位遣遼陽主簿石抹移迭東京翹院都監移刺葛補招契丹叛人爲白彥敬紇石烈志寧所害並贈鎮國上將軍令其家各食五品俸仍收錄其子甲辰以張浩爲太師尚書令如故御史大夫移刺元宜爲平章政事辛亥定世襲猛安謀克遷授格壬子以太保左領軍大都督奔睹

爲都元帥太保如故癸丑詔降蕭玉敬嗣暉許霖等官放
歸田里甲寅復用進士爲尚書省令史丙辰嵩州刺史石
抹木突刺等敗宋兵於壽安縣丁巳鄭州防禦使蒲察世
傑取陝州甲子詔都元帥奔睹開府山東經略邊事澤州
刺史特末哥及其妻高福娘伏誅閏月甲戌上謂宰臣曰
比聞外議言奏事甚難朕於可行者未嘗不從自今敷奏
勿有所隱朕固樂聞之戊子上謂宰臣曰臣民上書者多
勅尚書省詳閱而不即具奏天下將謂朕徒受其言而不
行也其亟條具以聞庚寅詔平章政事移刺元宜泰州路
規措邊事辛卯太和厚德殿火乙未尚書兵部侍郎溫敦

水突刺等與窩幹戰敗于勝州三月癸卯參知政事獨吉
義罷元帥左都監徒單合喜敗宋將吳璘于德順州甲辰
追削李通官職乙巳免南京正隆丁夫貸役錢辛亥以廉
平誠諭中外官吏癸亥詔河南陝西山東昨因捕賊良民
被虜爲賊者釐正之四月己巳右副元帥完顏謀衍等敗
窩幹于長樂辛未降廢帝亮爲海陵郡王乙亥詔減御膳
及宮中食物之半夏國遣使來賀即位及進方物及賀萬
春節右副元帥完顏謀衍復敗窩幹于霧霧河辛巳宴夏
使貞元殿故事外國使三節人從皆坐廡下賜食上察其
食不精腴曰何以服遠人之心掌食官皆杖六十癸未夏

使朝辭乞互市從之己丑以右丞相晏爲太尉壬辰詔征契丹部將士曰應契丹與大軍未戰而降者不得殺傷仍安撫之後招誘來降者除奴婢以已虜爲定其親屬使各還其家仍官爲贖之五月丁酉朔以曷速館節度使白彥敬爲御史大夫戊戌遣元帥左監軍高忠建會北征將帥討契丹己亥以臨海軍節度使紇石烈志寧爲元帥右監軍右副元帥完顏謀衍元帥右監軍完顏福壽坐逗遛召還京師皆罷之壬寅立楚王允迪爲皇太子詔中外丁巳押軍萬戶裴滿按刺猛安移刺沙里刺敗宋兵于華州六月戊辰命御史大夫白彥敬西北路市馬庚午以尚書右

丞僕散忠義爲平章政事兼右副元帥經略契丹詔出內
府金銀給征契丹軍用戊寅詔居庸關古北口譏察契丹
姦細捕獲者加官賞己卯詔守禦古北口及石門關庚辰
宋遣使賀即位壬午右副元帥僕散忠義與窩斡戰于花
道戊子以南京留守紇石烈良弼爲尚書右丞右副元帥
庚寅僕散忠義大敗窩斡于裊嶺西陷泉獲其弟裊壬辰
以西南路招討使完顏思敬爲元帥右都監七月丁酉復
取原州丙午宋主傳位于子昚甲寅詔諭契丹丁巳速頻
軍士朮里古等誣完顏謀衍子斜哥寄書其父謀反并以
其書上之上覽書曰此誣也止訊告者訊之果誣也朮里

古伏誅庚申太尉尚書左丞相晏致仕壬戌詔發濟州會
寧府軍在京師者以五千人赴北京都統府陝西都統璋
敗宋將吳璘于張義堡八月乙丑朔吳抹白謀克徐列等
降左監軍高忠建破吳于栲栳山及招降旁近吳六營有
不降者攻破之盡殺其男子以其婦女童孺分給諸軍丁
卯永興縣進嘉禾壬申萬戶溫迪罕阿魯帶與吳戰于古
北口敗焉詔同判太宗正事完顏謀衍等禦之癸酉上謂
宰臣曰百姓上書陳時政其言猶有所補卿等位居機要
略無獻替可乎夫聽斷獄訟簿書期會何人不能唐虞之
聖猶務兼覽博照乃能成治正隆專任獨見故取敗亡朕

早夜孜孜冀聞讜論卿等宜體朕意詔百司官吏凡上書
言事或爲有司所抑許進表以聞朕將親覽以觀人材優
劣夏國遣使賀尊號丁丑免齊國妃韓王亨樞密忽土留
守贖等家親屬在宮籍者詔元帥右都監完顏思敬以所
部軍與大軍會討窩斡乙酉詔左諫議大夫石琚監察御
史馮仲尹廉察河北東路丁亥詔御史臺曰卿等所劾惟
諸局行移稽緩及緩於赴局者耳此細事也自三公以下
官僚善惡邪正當審察之若止理細務而略其大者將治
卿等罪矣契丹老和尚降辛卯罷諸關征稅九月甲午朔
完顏謀衍擒異猛安合住元帥左都監徒單合喜大敗宋

將吳璘于德順州乙未詔尚書右丞紇石烈良弼以便宜
招撫奚契丹之叛者庚子元帥右都監完顏思敬獲契丹
窩斡餘衆悉平以尚書左司員外郎完顏正臣爲夏國生
日使壬寅獵于近郊乙巳以移刺窩斡平詔中外庚戌改
葬睿宗皇帝壬子以元帥右都監完顏思敬爲右副元帥
戊午詔思敬經略南邊辛酉奉遷睿宗皇帝梓宮于磐寧
宮癸亥元帥左監軍徒單合喜等敗宋兵于德順州河南
統軍使宗尹復取汝州十月丁卯以左副元帥完顏穀英
爲平章政事戊辰如山陵謁睿宗皇帝梓宮哭盡哀平章
政事右副元帥僕散忠義等還自軍上謁丙戌以僕散忠

義爲尚書右丞相元帥左監軍統石烈志寧爲左副九帥
戊子葬睿宗皇帝于景陵大赦己丑詔左副元帥統石烈
志寧經略南邊壬辰華州防禦使蒲察世傑丹州刺史赤
盞胡速魯改敗宋兵于德順州十一月癸巳朔詔右丞相
僕散忠義伐宋丁酉第職官廉能污濫不職各爲三等而
黜陟之十二月乙酉遣尚書刑部侍郎劉仲淵等廉察宣
諭東京北京等路

三年正月壬辰朔高麗夏遣使來賀庚子太白晝見壬子
遣客省使烏居仁賞勞河南軍士癸丑復取德順州二月
甲子詔太子少詹事楊伯雄等廉問山西路庚午上謂宰

相曰灤州饑民流散逐食甚可矜恤移於山西富民贍濟
仍于道路計口給食壬申詔撫諭陝西庚辰太保都元帥
奔睹薨丙戌趙景元等以亂言伏誅庚寅高麗夏遣使來
賀萬春節高麗遣使賀即位東京僧法通以妖術亂衆都
統府討平之三月丙申中都以南八路蝗詔尚書省遣官
捕之壬寅詔戶部侍郎魏子平等九人分詣諸路猛安謀
克勸農及廉問詔臨潢漢民逐食於會寧府濟信等州庚
戌詔免去年租稅四月辛酉朔右副元帥完顏思敬罷丁
卯平章政事完顏穀英御史大夫白彥敬罷以參知政事
李石爲御史大夫丁丑詔吏犯贓罪雖會赦不叙己卯以

引進使韓綱爲橫賜高麗使乙酉叛山西路猛安謀克貧民給六十日糧是月取商號環州宋所侵一十六州至是皆復五月辛卯朔右丞相僕散忠義朝京師乙未以重五幸廣樂園射柳命皇太子親王百官皆射勝者賜物有差上復御常武殿賜宴擊毬自是歲以爲常丙申宋人攻破靈壁虹縣己亥罷河南山東陝西統軍司置都統副統以太子詹事完顏守道從皇太子上召諭守道曰卿任執政所責非輕自今毋從行辛丑以右丞相僕散忠義兼都元帥癸卯僕散忠義還軍河南路都統奚撻不也叛入于宋丙午宋人攻破宿州辛亥更定出征軍逃亡法尚書省請

籍天德間被誅大臣諸奴隸及從窩斡亂者爲軍上以四方甫定民意稍蘇而復簽軍非長策不聽癸丑詔諭契丹餘黨蒲速越等如能自新並釋其罪若執蒲速越父子以來者仍官賞之左副元帥紇石烈志寧復取宿州河南副統字木魯定方死于陣乙卯以北京留守完顏思敬復爲右副元帥中都蝗詔參知政事完顏守道按問大興府捕蝗官六月庚申朔日有食之以刑部尚書蘇保衡爲參知政事丙子詔曰正隆之末濟州路逃回軍士爲中都官軍所邀殺者官爲收葬已卯觀稼于近郊甲申太師尚書令張浩罷以宿直將軍阿勒根和衍爲橫賜夏國使七月

庚戌太白晝見以太子太師宗憲爲平章政事以孔總爲
襲封衍聖公八月丙寅太白經天庚午詔曰祖宗時有勞
効未曾遷賞者五品以上聞奏六品以下及無職事者尚
書省約量升除甲戌詔參知政事完顏守道招撫契丹餘
黨戊寅詔罷契丹猛安謀克其戶分隸女直猛安謀克命
諸官貧年老者許存馬一二疋餘並括買入官勅殿前都
點檢唐括德溫重九出獵國朝舊俗今扈從軍二千能無
擾民可嚴爲約束仍以錢萬貫分賜之乙酉如大房山丁
亥薦享于睿陵戊子還宮癸巳宿直將軍僕散習尼列爲
夏國生日使九月丁酉秋獵以重九拜天子北郊丙午詔

翰林待制劉仲誨等廉問車駕所經州縣乙卯還宮十月
甲子大享于太廟丙寅以許王府長史移剌天佛留爲高
麗生日使癸酉冬獵十一月庚寅太白晝見經天壬辰還
都戊申詔求仕官輒入權要之門追一官仍降除以請求
有所饋獻及受之者具狀奏裁庚戌百官請上尊號不允
詔中都平州及饑荒地并經契丹剽掠有質賣妻子者官
爲收贖壬子尚書左丞程永固罷癸丑罷貢金線段疋甲
寅以尚書右丞紇石烈良弼爲左丞吏部尚書石琚爲參
知政事十二月丁丑臘獵于近郊以所獲薦山陵自是歲
以爲常詔流民未復業增限招誘己卯參知政事蘇保衡

至自軍辛巳以爲尚書右丞

四年正月丁亥朔高麗真遣使來賀戊子罷路府州元日
及萬春節貢獻上謂侍臣曰秦王宗翰有功於國何乃無
嗣皆未知所對上曰朕嘗聞宗翰在西京坑殺囚者千人
得非其報耶癸巳百官復請上尊號不允丁酉如安州春
水壬寅至安州大雪詔扈從人舍民家者人日支錢一百
與其主甲辰元帥府言宋遣審議官胡昉致尚書右僕射
書來議和好以其言失信拘昉軍中以書荅之及以書進
上覽之曰宋之失信行人何罪當即遣還邊事令元帥府
從宜措畫乙巳尚書省奏徐州民曹珪計賊江志而子弼

亦在賊中并殺之法當補二官叙雜班上以所奏未當進
一官正班用之辛亥獲頭鷲遣使薦山陵自是歲以爲常
二月丁巳免安州今年賦役及保塞縣御城邊吳二村凡
扈從人嘗止其家者亦復一年辛酉獵于高陽之北庚午
還都庚辰以北京粟價踴貴詔免今年課甲三月丙戌朔
萬春節高麗夏遣使來賀詔免北京歲課段匹一年庚子
京師地震壬寅百官復請上尊號不允四月丁巳平章政
事完顏元宜罷甲戌出宮女二十一人五月旱癸卯勅有
司審冤獄禁宮中音樂放毬場後夫乙巳詔禮部尚書王
競禱雨于北岳己酉命參知政事石琚等於北郊壇祭禱

兩壬子兩窩幹餘黨蒲速越伏誅六月甲寅朔日有食之
壬戌尚書左丞統石烈良弼至自征南元帥府甲子以兩
足命有司祭謝嶽鎮海瀆于北郊己巳幸東宮視皇太子
疾庚午初定祭五嶽四瀆禮辛未觀稼于近郊庚辰詔諭
元帥府曰所請伐宋軍萬五千今以騎三千步四千赴之
詔陝西元帥府議入蜀利害以聞七月壬辰故衛王襄妃
及其子和尚以妖妄伏誅庚子以尚書左丞統石烈良弼
爲平章政事辛丑大風雷雨拔木八月甲寅朔詔征南元
帥府曰前所請收復舊疆乞候秋涼進發今已秋涼復俟
何時戊午以參知政事完顏守道爲尚書左丞大興尹唐

括安禮爲參知政事壬申上謂宰臣曰卿每奏皆常事凡
治國安民及朝政不便於民者未嘗及也如此則宰相之
任誰不能之已卯如大房山辛巳致祭于山陵九月癸未
朔還都乙酉上謂宰臣曰形勢之家親識訴訟請屬道運
官吏往往屈法徇情宜一切禁止己丑上謂宰臣曰北京
懿州臨潢等路嘗經契丹寇掠平薊二州近復蝗旱百姓
艱食父母兄弟不能相保多冒鬻爲奴朕甚閱之可速遣
使閱實其數出內庫物贖之乙未幸鷹房主者以鷹隼置
內省堂上上怒曰此宰相聽事豈置鷹隼處耶痛責其人
俾置他所己亥以宿直將軍烏里雅爲夏國生日使辛亥

以太子少詹事烏古論三合爲高麗生日使十月癸亥朔
獵于密雲縣丙寅還都已卯命泰寧軍節度使張弘信等
二十四人分路通檢諸路物力十一月乙酉征南都統徒
單克寧敗宋兵取楚州已丑封子永功爲鄭王辛卯冬獵
乙未詔進師伐宋戊戌次河間府辛丑尚書省火甲辰次
清州閏月壬子朔還都十二月丁亥尚書省奏都統高景
山取商州已丑臘獵于近郊辛卯太白晝見經天是歲大
有年斲死罪十有七人

五年正月辛亥朔高麗夏遣使來賀乙卯詔泰州臨湟接
境設邊堡七十駐兵萬三千已未宋通問使魏杞等以國

書來書不稱大稱姪宋皇帝稱名拜拜奉書于叔大金皇帝歲幣二十萬辛未詔中外復命有司旱蝗水溢之處與免租賦癸酉命元帥府諸新舊軍以六萬人留戍餘並放還以宋國歲幣悉賞諸軍二月壬午以左副都點檢完顏仲等為宋報問使壬寅罷納粟補官令三月戊申萬春節宋高麗夏遣使來賀壬申羣臣奉上尊號曰應天興祚仁德聖孝皇帝詔中外四月癸卯西京留守壽王京謀反獄成特免死杖之除名嵐州安置乙巳右副元帥完顏思敬罷丁未右丞相都元帥僕散忠義還自軍五月壬子左副元帥紇石烈志寧以召入見丁巳以僕散忠義為尚書左

丞相紇石烈志寧爲平章政事遷軍乙丑以平章政事宗
憲爲尚書右丞相癸酉罷山東路都統府以其軍各隸總
管府六月甲辰芝產大安殿柱丙午京師地震兩毛七月
戊申朔京師地震復罷陝西都統府復置統軍司京兆徙
陝西元帥府河中八月己卯前宿州防禦使烏林荅剌撒
以與宋李世輔交通伏誅癸巳宋夏遣使賀尊號九月丁
未朔以吏部尚書高衍等爲賀宋生日使戊申秋獵庚戌
以宿直將軍木虎蒲查爲夏國生日使甲戌還都十月丁
丑朔地震辛巳以大宗正丞璋爲高麗生日使乙未冬獵
辛丑還都十一月丙午朔上謂宰臣曰朕在位日淺未能

徧識臣下賢否全賴卿等盡公舉薦今六品以下殊乏人材何以副朕求賢之意癸丑華東宮戊午以右副都點檢烏古論粘沒曷爲賀宋正旦使癸亥立諸路通檢地土等第稅法癸酉大霧晝晦十二月己丑獵于近郊高麗遣使賀尊號六年正月丙午朔宋高麗夏遣使來賀庚午勅有司宮中張設毋以塗金爲飾二月丁亥尚書左丞相兼都元帥沂國公僕散忠義薨三月壬寅萬春節宋高麗夏遣使來賀甲寅上如西京庚申次歸化州西京留守唐括德溫上謁戊辰至西京庚午朝謁太祖廟壬申擊毬百姓縱觀四月甲戌朔詔月朔禁屠宰戊戌以尚書右司郎中移

刺道爲橫賜高麗使宿直將軍斜郊摑刺爲橫賜夏國使
辛丑太白晝見五月戊申華嚴寺觀故遼諸帝銅像詔
主僧謹視之壬子詔雲中大同縣及警巡院給復一年壬
戌詔將華銀山諸扈從軍士賜錢五萬貫有敢損苗稼者
並償之六月辛巳太白晝見經天丙戌發自西京庚子獵
于銀山七月辛酉次三义口八月辛未朔次涼陘庚辰獵
于望雲之南山九月辛丑朔至自西京丁未以戶部尚書
魏子平爲賀宋生日使辛亥以翰林待制移刺熙載爲夏
國生日使澤州刺史劉德裕等以盜用官錢伏誅壬子太
白晝見癸丑尚書右丞相宗憲薨丙辰太白晝見經天十

月己卯以尚書兵部侍郎移刺按蒼爲高麗生日使甲申
朝享于太廟詔免雄莫等州今年租壬辰太白晝見經天
丁酉如安肅州冬獵十一月丙午還都癸丑以右副都點
檢烏古論元忠爲賀宋正旦使上謂宰臣曰朝官當慎選
其人庶可激勵其餘若不當則破覬覦之心卿等必知人
才優劣舉實才用之庚申太白晝見經天丁卯參知政事
右琚以母憂罷十二月甲戌詔有司每月朔望及上七日
母奏刑名戊子太白晝見經天甲午泰州民合住謀反伏
誅丙申以平章政事紇石烈良弼爲尚書右丞相紇石烈
志寧爲樞密使

七年正月庚子朔宋高麗夏遣使來賀辛亥石琚起復參知政事壬子上服衮冕御大安殿受尊號冊寶禮癸丑大赦庚申以元帥左監軍徒單合喜爲樞密副使二月庚寅尚書右丞蘇保衡薨丙申以參知政事石琚爲尚書右丞三月己亥朔萬春節宋高麗夏遣使來賀四月戊辰朔日有食之壬辰以御史大夫李石爲司徒大夫如故五月丙午大興府獄空詔賜錢三百貫爲宴樂之用以勞之甲寅以北京留守韓益溫敦兀帶爲參知政事六月癸酉命地衣用龍文者罷之七月戊申禁服用金線其織賣者皆抵罪丙辰華東宮己未華東宮視皇太子疾閏月丁卯觀稼

于近郊戊辰越王永中進封許王鄭王永初封隨王永成
封濬王甲戌詔遣秘書監移刺子敬經略北邊戊寅幸東
宮己卯慶雲環日壬午觀稼于近郊戊子觀稼于北郊八
月辛亥慶雲環日癸丑尚書右丞相監脩國史紇石烈良
弼進太宗實錄上立受之己未如大房山壬戌致祭睿陵
九月乙丑朔還宮己巳右三部檢法官韓贊以捕蝗受賂
除名詔吏人但犯賊罪雖會赦非特旨不叙以勸農使蒲
察莎魯窩等爲賀宋生日使辛未參知政事唐括安禮罷
乙亥以宿直將軍唐括鵬魯爲夏國生日使庚辰地震辛
巳以都水監李衛國爲高麗生日使乙酉秋獵庚寅次保

州詔修起居注王天棋察訪所經過州縣官十月乙未朔
上謂侍臣曰近聞朕所幸郡邑曾宴寢堂宇後皆避之此
甚無謂可宣諭令仍舊居止戊申還都丁巳上謂宰臣曰
海陵不辨人才優劣惟徇己欲多所升擢朕即位以來以
此爲戒止取實才用之近聞蠡州同知移刺延壽在官汚
濫詢其出身乃正隆時鷹房子如鷹房厨人之類可典城
牧民耶自今如此局分不得授以臨民職任以御史中丞
孟浩爲參知政事是日參知政事耨益溫敦兀帶薨辛酉
勅有司於東宮涼樓前增建殿位孟浩諫曰皇太子雖爲
儲貳宜示以儉德不當與至尊宮室相侔乃罷之十一月

乙丑朔上謂宰臣曰聞縣令多非其人其令吏部察其善惡明加黜陟辛未以河間尹徒單克寧等爲賀宋正旦使壬申太白晝見丁丑歲星晝見丁亥樞密副使徒單合喜罷十二月戊戌東京留守徒單合喜北京留守完顏謀衍肇州防禦使蒲察通朝辭賜通金帶諭之曰卿雖有才然用心多詐朕左右須忠實人故命卿補外賜卿金帶者答卿服勞之久也又顧謂左宣徽使敬嗣輝曰如卿不可謂無才所欠者純實耳甲辰以北京留守完顏思敬爲平章政事是歲斲死囚二十人

八年正月甲子朔末高麗夏遣使來賀乙丑上謂宰臣曰

朕治天下方與卿等共之事有不可各當面陳以輔朕之不逮慎毋阿順取容卿等致位公相正行道揚名之時苟或偷安自便雖爲今日之幸後世以爲何如群臣皆稱萬歲辛未謂秘書監移刺子敬等曰昔唐虞之時未有華飾漢惟孝父務爲純儉朕於宮室惟恐過度其或興修即損宮人歲費以充之今亦不復營建矣如宴飲之事近惟太子生日及歲元嘗飲酒往者亦止上元中秋飲之亦未嘗至醉至於佛法九所未信梁武帝爲同泰寺奴遼道宗以民戶賜寺僧復加以三公之官其惑深矣庚辰行皇太子冊禮二月甲午朔制子爲改嫁母服喪三年上諭左宣徽

使敬嗣輝曰凡爲人臣上欲要君之恩下欲干民之譽必
虧忠節卿宜戒之三月癸亥朔萬春節宋高麗夏遣使來
賀已巳命以職官子補令吏丁丑命護衛親軍百戶五十
戶非直日不得帶刀入宮己丑太白晝見四月丙午詔曰
馬者軍旅所用牛者農耕之資殺牛有禁馬亦何殊其令
禁之戊申擊毬常武殿司天馬貴中諫曰陛下爲天下主
繫社稷之重又春秋高園獵擊毬危事也宜悉罷之上曰
朕以示習武耳五月甲子北望淀太震風雨雹廣十里長
六十里詔戶工兩部自今宮中之飾並勿用黃金乙丑上
如涼陘丁卯歲星晝見庚寅改旺國崖曰靜寧山曷里許

東川曰金蓮川六月河決李固渡水入曹州七月甲子制盜群牧馬者死告者給錢三百貫戊辰上謂平章政事完顏思敬等曰朕思得賢士寤寐不忘自今朝臣出外即令體訪外任職官廉能者及草萊之士可以助治者具姓名以聞甲戌秋獵已卯次三义口上諭點檢司曰沿路禾稼甚佳其扈從人少有蹂踐則當汝罪八月乙卯至自涼陞九月辛酉上諭尚書右丞石琚參政孟浩曰聞蔚州採地輩役夫數百千人朕所用幾何而擾動如此自今差役凡稱御前者皆須稟奏仍令附冊癸亥以右宣徽使移剌神獨幹等爲賀宋生日使已巳以引進使高希甫爲夏國生

日使庚午上幸東宮癸酉上諭宰臣曰卿等舉用人材凡
已所知識必使他人舉奏朕甚不喜如其果賢何必以親
疎爲避忌也以戶部尚書魏子平爲參知政事辛巳上謂
御史大夫李石曰臺憲固在分別邪正然內外百司豈謂
無人惟見卿等劾人之罪不聞舉善自今宜令監察御史
分路刺舉善惡以聞上嘗命左衛將軍大磐訪求良弓而
磐多自取護衛婁室以告上命點檢司鞠磐磐妹爲寶林
磐屬內侍僧兒言之寶林寶林以聞命杖僧兒百出磐爲
隴州防禦使十月己丑朔以戒諭官吏貪墨詔中外乙未
命涿州刺史無提點山陵每以朔望致祭朔則用素望則

用肉仍以明年正月爲首及命圖畫功臣於太祖廟其未
立碑者立之以翰林待制靖爲高麗生日使上謂宰臣曰
海陵時脩起居注不任直臣故所書多不實可訪求得實
詳而錄之參政孟浩進曰良史直筆君舉必書自古帝王
不自觀史意正在此辛亥詔罷復州歲貢鹿筋十一月乙
丑幸東宮以同簽大宗正事闢合土等爲賀宋正旦使十
二月戊子朔遣武定軍節度使移剌按等招諭阻鞑

九年正月戊午朔宋高麗夏遣使來賀辛酉上與宣徽使
敬嗣暉秘書監移剌子敬論古今事因曰亡遼日屠食羊
三百亦豈能盡用徒傷生耳朕雖處至尊每當食常思貧

民飢餒猶在已也彼身爲惡而口祈福何益之有如海陵以張仲軻爲諫議大夫何以得聞忠言朕與大臣論議一事非正不言卿等不以正對豈人臣之道也庚午詔諸州縣和糴毋得抑配百姓戊寅契丹外失刺等謀叛伏誅丙戌制漢人渤海兄弟之妻服闋歸宗以禮續婚者聽二月庚寅制妄言邊關兵馬者徒二年丙申詔改葬漢二燕王於城東夾子以中都等路水免稅詔中外又以曹單二州被水尤甚給復一年甲寅詔女真人與諸色人公事相關只就女直理問三月丁巳朔萬春節宋高麗夏遣使來賀丁卯以尚書省定網捕走獸法或至徒上曰以禽獸之故

而抵民以徒是重禽獸而輕民命也豈朕意哉自今有犯
可杖而釋之詔御史中丞移刺道廉問山東河南辛未禁
民間稱言銷金條理內舊有者改作明金字辛巳以大名
路諸猛安民戶艱食遣使發倉廩減價出之四月己丑謂
宰臣曰朕觀在位之臣初入仕時競求聲譽以取爵位亦
既顯達即徇默苟容爲自安計朕甚不取宜宣諭百官使
知朕意癸巳遣翰林脩撰蒲察兀虎監察御史完顏鵬沙
分詣河北西路大名河南山東等路勸猛安謀克農五月
丙辰朔以符寶郎徒單懷貞爲橫賜高麗使宿直將軍完
顏賽也爲橫賜夏國使戊辰尚書省奏越王永中隋王永

功二府有所興造發役夫上曰朕見宮中竹有枯瘁者欲
令更植恐勞人而止二王府各有引從人力又奴婢甚多
何得更役百姓爾等但以例爲請海陵橫役無度可盡爲
例耶自今在都浮役久爲例者仍舊餘並官給傭直重者
奏聞六月庚寅冀州張和等反伏誅戊戌以久旱命宮中
毋用扇庚子雨七月乙卯朔罷東北路探珠壬申觀稼于
近郊八月甲申朔有司奏日食以雨不見伐鼓用幣如常
禮九月甲寅朔以刑部尚書高德基等爲賀宋生日使宿
直將軍僕散守中爲夏國生日使提點司天臺馬貴中爲
高麗生日使罷皇太子月料歲給錢五萬貫上謂臺臣曰

比聞朝官內有攬中官物以規貨利者汝何不言皆對曰
不知上曰朕尚知之汝有不知者乎朕若舉行汝將安用
壬戌秋獵十月丁亥還都辛丑以尚書右丞相統石烈良
弼爲左丞相樞密使統石烈志寧爲右丞相詔宗廟之祭
以鹿代牛著爲令丙午大亨于太廟辛亥以平章政事完
顏思敬爲樞密使十一月己未以尚書左丞完顏守道爲
平章政事右丞石琚爲左丞參知政事孟浩爲右丞庚申
上幸東宮辛酉以京兆尹毅等爲賀宋正旦使壬戌冬獵
丙子還都十二月丙戌詔賑臨潢泰州山東東路河北東
路諸猛安民以東京留守徒單合喜爲平章政事丁酉太

白晝見辛丑獵于近郊丙午制職官犯公罪在官已承伏者雖去官猶論

十年正月壬子朔宋高麗夏遣使來賀甲子命宮中元宵無得張燈甲戌以司徒御史大夫李石爲太尉尚書令二月甲午安化軍節度使徒單子溫副使老君奴以賊罪伏誅戊申上謂近臣曰護衛以後皆是治民之官其令教以讀書三月壬子朔萬春節宋高麗夏遣使來賀丙辰上因命護衛中善射者押賜宋使射弓宴宋使中五十押宴者纔中其七謂左右將軍曰護衛十年出爲五品職官每三日上直役亦輕矣豈徒令飽食安卧而已弓矢不習將焉

用之戊午以河南統軍使宗叙爲參知政事庚午上謂參
政宗叙曰卿昨爲河南統軍時言黃河堤埽利害甚合朕
意朕每念百姓差調官吏互爲姦弊不早計料臨期星火
率歛所費倍蓰爲害非細卿既參朝政皆當革弊擇利行
之又諭左丞石琚曰女直人徑居遼要不知閭閻疾苦汝
等自丞簿至是民間何事不知凡有利害宜悉數陳四月
丁酉制命婦犯姦不用夫廕以子封者不拘此法五月乙
卯如柳河川閏月庚辰夏國任得敬脅其主李仁孝使上
表請中分其國上問宰臣李石石等以爲事繫彼國不如
許之上曰彼劫於權臣耳詔不許并却其貢物七月壬午

秋獵戊戌放圍場役夫詔扈從糧食並從官給乙巳勅扈
從人縱畜牧蹂踐禾稼者杖之仍償其直八月己未至自
柳河川壬申遣參知政事宗叙北巡九月庚辰尚書左丞
相紇石烈良弼丁憂起復如故壬午以簽書樞密院事移
刺子敬為賀宋生日使庚寅以戶部郎中夾谷阿里補為
夏國生日使十月己酉以大宗正丞弘為高麗生日使甲
寅如霸州冬獵乙丑上謂大臣曰比因巡獵聞固安縣令
高昌裔不職已令罷之霸州司候成奉先奉職謹恪可進
一階除固安令辛未上謂宰臣曰朕凡論事有未能深究
其利害者卿等宜悉心論列無為面從而退有後言十一

月辛巳制盜太廟物者與盜宮中物論同甲申上幸東宮
丁亥以太子詹事蒲察蒲速越等爲賀宋正旦使癸巳夏
國以誅任得敬遣使來謝詔慰諭之十二月丙寅上謂宰
臣曰比體中不佳有妨朝事今觀所奏事皆依條格殊無
一利國之事若一朝行一事歲計有餘則其利博矣朕居
深宮豈能悉知外事卿等尤當注意

十一年正月丙子朔宋夏遣使來賀丁丑封子永升爲徐
王永蹈爲滕王永濟爲薛壬午詔職官年七十以上致
仕者不拘官品並給俸祿之半丙申命賑南京屯田猛安
被水災者戊戌尚書省奏汾陽軍節度副使牛信昌生日

受饋獻法當奪官上曰朝廷行事苟不自正何以正天下
尚書省樞密院生日節展饋獻不少此而不問小官饋獻
即加按劾豈正天下之道自今宰執樞密饋獻亦宜罷去
上謂宰臣曰往歲清暑山西近路禾稼甚廣殆無畜牧之
地因命五里外乃得耕墾今聞民皆去之他所甚可矜憫
其令依舊耕種事有類此卿等宜即告朕三月乙亥朔萬
春節宋夏遣使來賀辛巳命有司以天水郡公旅櫬依一
品禮葬於鞏洛之原四月丁未歸德府民臧安兒謀反伏
誅大理卿李昌圖以廉問真定尹徒單貞咸平尹石抹阿
汲刺受賊不法既得罪狀不即黜罷杖之四十癸亥參知

政事魏子平罷高麗國王暉弟皓廢其主自立詐稱讓國遣使以表來上五月辛卯詔遣吏部侍郎靖使高麗問故癸巳以南京留守移刺成為樞密副使六月巳酉詔曰諸路常貢數內同州沙苑羊非急用徒勞民爾自今罷之朕居深宮勞民之事豈能盡知似此當具以聞戊午觀稼于近郊甲子平章政事徒單合嘉薨七月甲申參知政事宗叙薨八月癸卯朔太白晝見詔朝臣曰朕嘗諭汝等國家利便治體遺闕皆可直言外路官民亦嘗言事汝等終無一語凡政事所行豈能皆當自今直言得失毋有所隱乙巳上謂宰臣曰隨朝之官自謂歷一考則當得其職兩考

則當得其職第務因循碌碌而已自今以外路官與內除者察其公勤則外用之但苟簡於事不須任滿便以本品出之賞罰不明豈能勸勉庚戌詔曰應因窩幹被掠女直及諸色人未經刷放者官為贖放隱匿者以違制論其年幼不能稱說住貫者從便住坐上謂宰臣曰五品以下闕員甚多而難於得人三品以上朕則知之五品以下不能知也卿等曾無一言見舉者欲畫久安之計興百姓之利而無良輔佐所行皆尋常事耳雖日日視朝何益之有卿等宜勉思之已巳以尚書刑部侍郎烏林荅天錫等為賀宋生日使近侍局使劉琬為夏國生日使九月癸未獵于

橫山庚寅還都十月壬寅朔以左宣徽使敬嗣暉爲參知政事甲寅上謂宰臣曰朕已行之事卿等以爲成命不可復更但承順而已一無執奏且卿等凡有奏何嘗不從自今朕旨雖出宜審而行有未便者即奏改之或在下位有言尚書省所行未便亦當從而改之母拒而不從丙寅尚書左丞相紇石烈良弼進睿宗實錄戊辰上謂宰臣曰衍慶宮圖畫功臣已命增爲二十人如丞相韓企先自本朝興國以來憲章法度多出其手至於關決大政但與大臣謀議終不使外人知覺漢人宰相前後無比若褒顯之亦足示勸慎無遺之十一月丁丑以西南路招討使宗寧等

爲賀宋正旦使戊寅辛東宮上謂皇太子曰吾兒在儲貳之位朕爲汝措天下當無復有經營之事汝惟無忘祖宗純厚之風以勤修道德爲孝明信賞罰爲治而已昔唐太宗謂其子高宗曰吾伐高麗不克終汝可繼之如此之事朕不以遺汝如遼之海濱王以國人愛其子嫉而殺之此何理也子爲衆愛愈爲美事所爲若此安有不亡唐太宗有道之君而謂其子高宗曰爾於李勣無恩今以事出之我死宜即授以僕射彼必致死力矣君人者焉用偽爲受恩於父安有忘報於子者乎朕御臣下惟以誠實耳群臣皆稱萬歲丙戌朝享于太廟丁亥有事于圓丘大赦癸巳

群臣奉上尊號曰應天興祚欽文廣武仁德聖孝皇帝乙未詔中外十二月癸卯冬獵乙卯還宮丙辰參知政事敬嗣暉薨辛酉進封越王永中趙王隨王永玠曹王瀋王永成幽王徐王永升虞王滕王永蹈徐王薛王永濟滕王乙丑趙王永中曹王永玠俱授猛安仍命永玠親治事以習爲政

本紀第六